



列朝詩集

丁集第十四

白雲居士石沈 四十首

盛太學鳴世 二十八首

吳處士兆 一百一十五首

吳山人夢暘 五十九首

王山人野 一十七首

曹南宮學佺 八十三首

柳山人應芳 三十四首

范太學泐 七十四首

吳居士鼎芳 八十三首

沈布衣野 二十九首

葛理問一龍 六十八首

王居士醇 六十六首

曹山人臣 二首

王遺民鎔 九十首

白雲居士石沈

沈字濯仲如臯人有白雲居士集二卷濯仲歿後萬曆庚戌歲其友人殷之澤所定也余采詩於白下從黃仲子得濯仲詩讀而異之不知為何許人訪之金陵人金陵人亦莫知濯仲為何人也其為詩陶冶性情蕭閒疎放雅以寒山擊壤自命而吾則以為古之香山今之江門也讀其詩窺見其志意糠粃世故尋仙學佛超然自遠不可羈縻者也自敘其江門詩曰

余素苦作詩不能即就或日一就者有之或月一就者有之壬辰前孟春之月擬香山詩依平叶爲聲一晝夜得近體三十絕句四知其非儷花鬪葉以聲律爲能事者也大江南北僅一衣帶去溘仲不及三十年其流風遺書寥寥若此而余乃且莫遇之如見優曇鉢花得未曾有豈不快哉明廣陵詩載其詩數首殊不足觀溘仲面目幾爲所掩以此知識真者之寡而求子雲于後世良未可幾也余取溘仲詩冠於近代名士之首鍾記室品陶徵士爲隱逸詩人之宗余於近代願以推溘仲與知者共定之

觀稻

稻水千區映村煙幾處斜冷風低起樹輕浪細浮花鳥雀深深圃鳧鷖淺淺沙社歌聲不絕於此見年華

掃張氏婦墓

雲歸巫峽雨陽臺杜宇聲聲喚不回惟有春風最憐惜墓田收拾紙錢灰

廣陵紀夢

春盡他鄉夢雲林思杳然落花溪水上斜日洞門前鶴去遊城郭春來弄管絃倚闌懷勝事光細月初弦

宿城中舊房

從教雁侶失瀟湘春色年年暗洞房遺得一枝花影子夜深隨月轉西廊

夢中吟

樹老何年寺山深此夜鐘一僧眉拄地教我學南宗

口號送鄰家米

東鄰雨濕火難吹斗米田家尚可爲晚稻未春潮水白早紅先送救公饑

題主人壁間樊素小蠻圖

江州司馬兩紅妝水墨何人畫此堂得似往年歌意思却看今日舞衣裳摸聲漫點櫻珠破擬態輕拖柳帶長別有幽情傳筆底主人狂得且須狂

擬寒山我見世中人二首

我見世中人日夜心兵動布帛不遮寒藿塩不塞空欲求安樂法錯認逍遙夢米大一粒珠分應六門用

我見世中人開口便講理將理與人爭還是不明理多爭理在伊少爭理在你爭人所不爭不爭之爭矣

新春雜興

一囊置我琴。一囊置我笛。明月照寒江。扁舟吊采石。

漫興二首

竹影清溪路。花藏白石巖。病偏宜短褐。老不廢長鑿。階水鵝兒浴。池泥燕子銜。儘堪吟弄去。風月兩三函。窗下兀兀坐。人間事事疎。亂山看過畫。堆案讀殘書。細雨銜杯後。微風隱几餘。不勞漁父問。方寸已空虚。

無題

落日早涼歸。看山倚竹扉。水清仍可鑑。雲薄不成衣。腐草螢低照。疎林鳥亂飛。平生簞笠意。不在富春磯。

文翼姪草堂

結構離人境。經營到野田。春光鶯語外。秋色雁行邊。室小剛容膝。牆高不過肩。個中些子意。應與會人傳。

去歲中秋

去歲中秋月。江南水上天。剝菱煩伎手。煮茗汲僧泉。卽事渾如昨。追歡已隔年。算遲婚嫁了。還弄五湖煙。

夜聽琵琶

娉婷少婦未關愁。清夜琵琶上小樓。裂帛一聲江月白。碧雲飛起四山秋。閑中喜慕溪兄見過。

鷓鴣滿晴沙。江村好歲華。投竿魚浪細。舉袂燕風斜。林竹初開笋。溪蘋正有花。得君相聚首。沽酒問誰家。

歸來吟

只成無喜亦無憎。隨處看山倚瘦藤。煙雨樓臺渾在寺。水蔬家世半皈僧。一閒可敵三公貴。隻眼真傳六祖燈。漫道秋江魚事美。月明空坐板橋罾。

荅友人書寄

自笑年來休未休。空勞夢語說虛舟。塵埃未脫飢寒累。稼穡寧忘水旱憂。難道琴書間北牖也。曾風雨事西疇。餘生只不填溝壑。此外分毫無所求。

溪邊

昨夜溪橋上。南畦看稻還。解襟聊濯足。對影暫開顏。群動無時息。幾人如我閒。獨行還獨坐。涼月上東山。

夏日寄懷南逸士

南隣何異北山居。黃草衣裳白草廬。閒却農桑事吟弄。不教風月著空虛。

秋思

曠野碧雲暮。園林白露秋。水花清瑟瑟。窗竹冷修修。索莫惟禁酒。躊躇欲上樓。相思不相見。多病益多愁。

有懷

遠村幽壑獨徘徊。雲護柴扉雪護苔。盡日溪邊倚枯柳。白鷗何事不飛來。

寄蓮宇上人

憶昔相從春水殘。桃花映竹鳥啼山。半年好景違僧舍。十月西風凋客顏。短褐羞如黃葉舞。方袍定似白雲閒。草堂蓮社天南北。惆悵幽期隔往還。

夜催花

漏鼓無聲清露寒。西樓殘月夜漫漫。飛觴莫訝花催急。世界宜橫醉眼看。

與二十二弟

曾騎竹馬妄追風。經世衰榮約畧同。俱是賤人牛口下。未離故態雁行中。

新墻門

北屋連江面。遠峰水禽山。鹿謾相從徑。因待月還宜。曲門為藏春。再設重

雨暗。蘼蕪分綠鎖。天晴楊柳借雲封。攻琴樂酒年來癖。更好垂簾稱懶慵。

寄敏上人

別來多雨更多風。野水蒼茫浸碧空。惆悵數枝憔悴柳。不堪持贈膽瓶中。

客有姑蘇約奉柬

松院袈裟葦岸簷。太湖漁父虎丘僧。因君來約同相訪。月好風清能不能。

飲慕溪所惠酒

是時天氣炎。人事難調攝。飲水過于寒。飲湯過于熱。得君之所惠。清淨如油潔。不用脫巾漉。不用置勑斲。亦不用多人。夫婦西廊月。一盞四肢暘。兩盞百情滅。三盞卽醺醺。五藏皆融洩。本不愛貪杯。獨醒難過日。

雜興

飽罷披書便理瓜。閒中誰道沒生涯。遣情亦要寬沽酒。醒睡還須窄煮茶。細草籬根侵病菊。古苔階面覆殘花。傍人不解儂家事。只道貪閒不管家。

自詠

我有安樂處。名為建德鄉。唱于風起籟。虛白月生光。自謂青雲館。何慙綠野堂。傍牕低竹几。臨水小繩床。居士齋時臥。先生醉後狂。眼前無異物。身

外有餘糧蔬食尋常飯葷腥間或嘗淨神三遍呪煖室一爐香念念歸真境心心向道場世間安飽事一切不思量

破屋

三間破屋兩間空廊壁蕭然西復東慘惻豈宜愁坐客清虛聊稱病眠翁敢將道義誇汾水惟有詩歌抵雒中客到消閒無一物竹牕明月柳橋風

中秋

江村此夕意如何道是橋平水不波彷彿空中倚樓閣分明鏡裏現山河當筵自對賢人酒得意閒吟孺子歌明月若教陪盡夜只拚清露濕漁蓑

閨重陽邀眾社集座中又呈一律

兩迴風景惜重陽倏見秋容變故常楊柳葉乾前夜雨芙蓉花老及時霜極知酒是消愁物何處臺非戲馬場拉得相知開口笑不嫌醉倒菊籬傍

歲暮不及去城中偶吟

空野平無盜長河凍絕船城中未可去江上正堪眠飽飯何曾缺燒柴不費錢且從俗人語打夥過殘年

移居城中東招溪上兩兄

荆樹江城隔梅花歲事殘曾經知別苦敢道行難凍雪銷泥濕霜風吹面寒一尊今到手來爲話辛酸

途中

冰礪擁流澌春回萬壑姿水清魚尾活泥濘馬蹄遲城郭來將晚江村到幾時欲沽無好店何日有新詩

江門擬白三十首錄二首

何處春偏勝江門自好風酒旗斜路口花信短墻東多病一居士雙鬟二小童題詩嵩雒去可是白家翁

何處春偏勝江門舊草堂和風團燕雀遲日散牛羊細草當牕綠殘花隔水香老狂猶稚子拍手咏滄浪

盛太學鳴世

鳴世字太古中都人本富家入貲爲國子生能詩攻苦不苟作善奕棋如唐入所謂居第二品出游人間福清相公雅與相善亦喜其善奕而已而太古雅自重其詩借方罫以翫世不屑以詩名混時流也居福清却中福清將引爲中翰不果歸游金陵卒于家有谷中集三卷不甚傳于世同時

為詩者皆未之稱也。新安閔生輯明布衣詩多載其五言。今體余觀其剪刻鮮淨，措置清穩，盡削常調，實為一時之雋。如烏啼白門夜，月上一樓霜。錢郎復生，何以過此。又就石分泉冷，和鐘杵藥勻。今人冥搜極索，未易有此佳句也。余初得太古詩，再欲置之燈下，繙閱見月上一樓霜之句，如有光芒，側出行間，三復始大異之。林茂之歎曰：世無知盛太古者矣。豈非其精華不死，浮動于楮墨之上，迎而相告與。

沈山人

落落尋常路，遑遑二十年。許身吾老矣，干世爾徒然。春日當壚酒，都城賣卜錢。有身堪自足，不必衆人憐。

送泰州李太守

不復關時論，將因與世違。受金廉吏枉，疑璧衆人非。淮海孤舟別，匡山白首歸。天寒江上雁，但恐尺書稀。

贈隱者

只在高霞外，無人識去踪。伴猿栖一室，放雀下孤峰。丹竈雲中火，青天棧半鐘。平生長往意，相望不相從。

至日

曝背便暄暖，灰心任歲時。衰年聊對酒，至日一題詩。洗藥冰初薄，探梅雪半垂。轉應貧與病，不厭老相隨。

沈水部官署

江水流何急，歸心却似之。已傷為客久，轉恨別君時。斷雁迷寒渚，吟猿挂冷枝。生涯兼物色，何處不堪悲。

送柯孝廉之巴東兼呈黃廣文

去問巴江水，荆門更向西。挂帆秋葉落，上峽夜猿啼。舊侶傷飄泊，新歡惜解携。湘潭憔悴地，已恐旅魂迷。

葉汝習病目移住西山戲簡

病懶因憐汝，深山且辟人。佛堂雲共宿，僧語夜相親。就石分泉冷，和鐘杵藥勻。不知天眼裏，何處着微塵。

送臨江蘇太守

五馬夾朱輪，清川不動塵。問山廬嶽近，領郡虎符新。吏冗詩難廢，民稀俗易淳。江花迎路發，十月待行春。

避暑呂叔與園亭因贈

避暑誰堪適。壺冰若可餐。一聞高士論。六月使人寒。雲起峰陰直。亭孤日氣殘。晚來山更好。不碍隔籬看。

西樓月下送陸長康

分散歡娛地。班駘送陸郎。烏啼白門夜。月上一樓霜。揚子分衣帶。明河接淚行。大刀重有約。團扇莫相忘。

七月八日潞河舟中別長安諸子

天漢龍初返。星橋鵲乍分。隔河收片雨。宿浦有殘雲。復作孤舟別。兼悲一葉聞。相看此時恨。不獨在離群。

寄孫慙生

草色青門外。楊花白雪邊。傷心猶昨日。轉眼向秋天。千世真何意。還家始自憐。蕭條淮水上。誰復問殘年。

重過程孺父

搖落秦淮上。依然見索居。客貧親舊少。家難死生餘。土銜朝烟冷。荒池古木疎。日斜殊未去。狼籍一床書。

送毛廣文之雲中

歲晏單車去。窮邊不算程。河水尋馬跡。關月逐雞聲。野燒雲中戍。春天雪外城。戰場應久定。問業有儒生。

送李雪舟

有客留行跡。令人一解顏。聽鐘尋曉寺。沽酒看春山。老病能相就。禪心許共閒。如何芳草色。又送馬蹄還。

宿麻河

積雨湖田沒。居人生事微。白魚休市早。烏鬼載船歸。月黑村春盡。林深岸火稀。緯蕭眠不定。中夜賦無衣。

重過華子澄

柳市南頭路。三年此重過。長貧爲客倦。高臥奈君何。嶺背夕陽盡。月明秋水多。徘徊那能去。門外卽煙波。

春陰長安作

積晦連幽朔。長陰動十旬。六花猶作雪。三月不成春。易白愁中髮。憎寒病裏身。因憐鄒衍後。吹律更何人。

夜過凌方弦山齋

十里到孤村。柴門下夕曛。霜鋪平野月。鐘斷隔溪雲。病骨逢秋健。清言忘夜分。自君多秘術。猿雀漸成群。

贈曹鳳岡

仙才多玩世。況復幕官閒。雀養空庭樹。雲栖傍閣山。酒干官長禁。詩乞野人刪。為有延徐榻。相期數往還。

寄懷毘陵孫二

適與飢寒會。重懷旅寓年。通家無仲子。舉世有誰賢。編性多違俗。權門豈慕羶。芳蘭漸下體。玉樹每齊肩。衣冷分繒絮。囊空乞酒錢。雪深燒燭夜。春遠踏花天。人事零如雨。歡期斷若烟。黃塵三歲別。白日幾迴眠。未賴今何似。華顛漸可憐。終能忘一飯。語報媿茫然。

送玉山人

寒原一雁下。霜空短褐蕭。蕭飈犯北風。俱是殘年行路客。傷心不在別離中。

題岳陽酒家

巴陵壓酒洞庭春。楚女當壚勸客頻。莫上高樓望湖水。烟波二月已愁人。

塞上贈友

一望黃雲接虜塵。年年楊柳不知春。解將白髮窺明鏡。縱使封侯也誤人。

江上別柳陳父

滄江落日黯生愁。楓葉蘋花送客舟。莫道酒闌容易別。秋光偏在斷橋頭。

送胡參軍之岷州

寶劍翩翩賦遠游。東風吹騎出幽州。洮河三月流漸下。人在長城天盡頭。

秦淮月

石頭望月秦淮裏。不知月在秦淮水。銀漢平鋪一色秋。珠閣瑤樓正相似。秦淮女兒十三餘。綃幕半捲坐飛除。霜妾星妃兩不如。雲中雀子那得住。桂樹團團繫舟處。極浦烟波從此去。

送陳獻輝入計

朔氣渡河水。生骨敝巾小。車傷遠涉。竭來送客三日程。不盡關山恨。重疊與君相知。豈徒然一片肝膽。千秋懸感恩。不忘國士報許心。更受他人憐。君今西去。謁人主。五玉諸侯聯佩組。漢家計吏開明堂。黃金璽書誰比數。朝罷從容下玉除。天樂縹緲雲中居。行過閭門問丞相。挽回元化今何如。

吳布衣兆

兆字非熊休寧人少警敏喜爲傳奇詞曲游少年場推爲渠帥萬曆中游金陵留連曲中與新城鄭應尼作白練裙雜劇譏嘲馬湘蘭青樓人皆指目有樊川輕薄之名已而自悔改茲爲歌詩樸樸初唐作秦淮鬪草篇新安詩派尸祝大函肥膿相尚不解爲何語臧晉叔曹能始見而擊節遂流傳都下而能始於非熊尤相得偕游閩中諸山及武夷匡廬九華復還白下其爲人率真自放好窮山林花鳥之致捉鼻苦吟貴游雜坐竟日諷咏不知有人久之別能始歸新安作東歸詩已而復出游訪故人於嶺南客死新會從弟元以其喪歸非熊詩評者謂有二種早年穠華婉至中歲清真瀟灑大要沈酣于六朝唐人而傳之以性情幹之以風調工力並深興象兼會雖與能始同調剪刻鎔鑄意新理愜能始似有間焉能始序其詩以爲古詩學靈運沿及盧駱近體學岑嘉州字句少實固宜其知之而未盡也新安閔景賢采輯皇朝布衣詩推若上吳允兆爲中興布衣之冠以予論之親炙則孟陽遜聽則非熊庶無媿於此評要當與千古共定之爾

秦淮鬪草篇

樂遊苑內花初開結綺樓前春早來春色染山還染水春光銜柳又銜梅此時芳草萋萋長秦淮女兒多閒想閒想玉閨閒羅衣正試單芳颺入戶吹帷動巧鳥當牕攪夢殘因嬌麗日長安道相戲相耍鬪芳草芳草匝初齊茸茸沒馬蹄芳草遠如算望望迷人步將綠將黃不辨名和煙和霧那知數鳳凰臺上舊時基燕雀湖邊當日路結伴踏春春可憐花氣衣香渾作烟誰分遲遲獨落後誰能采采不爭前嫋嫋柔間路佳期何暇顧悠悠淮水湄遠道不遑思空生謝客西堂夢徒怨湘娥南浦離未鳴鴉鳩先愁歇乍轉倉庚正及時正及時先愁歇密取畏人窺疾行防蘚滑入深翠濕衣緣高香襲襪寒若將何爲東芻欲待誰茜紅猶勝頰萸白却慙肌薜荔裁衣安可被菖蒲結帶豈堪垂盈匊盈檐羅衆芳蛾飛蝶繞滿衣裳蘭草藉作爭衡地蕙畹翻爲角敵場分行花隊逐對壘葉旗張花花非一色葉葉兩相當君有麻與泉妾有葛與薑君有蕭與艾妾有蘭與芷君有合歡枝妾有相思子君有拔心生妾有斷腸死羸婦若個中輸落阿誰裏相向無言轉自愁芳垆過客忽疑秋別本辭柯何倚託傾青委綠滿郊丘雖殘已受妍心惜縱賤曾經纖手摘芍藥多情且自留靡蕪有恨從教擲人生

寵愛幾能終。人心安得采時同。紫愁結念尋歸。逕接珮連裾。趁晚風情知
杳腐隨泥滓。會化流螢入幕中。

咏美人隔牆折花

離離墻影動。謂是東風吹。美人金梯出。纖手摘花枝。釧聲驚起鳥。紛紛落
玉墀。稍高攀不及。下望復移時。

送友人遊燕

離筵別棹。算江濱。紅樹青山映白蘋。一過江南風景異。兩行衰柳送行人。

銅雀妓

愁思應無賴。留香但益悲。妾身甘與殉。君家自多疑。秋氣生臺榭。涼風入
蕙帷。朝朝歌舞作。不似望恩時。

早春行

蕙光初上砌。草色已含晴。日汎釵梁艷。風開裊繭輕。憐雙臨水坐。畏隻映
花行。無數梅將柳。羞人蓄笑迎。

古別離

車麟麟。馬特特。路上行人行不息。丈夫一去音信稀。門前凝望是耶非。羅

巾掩面。羞回顧。翻令小姑笑。妾誤憶。妾家中。嬌小姿。愛弄玉環阿母隨。只
知嬌養無愁苦。常咲他人怨別離。如今小姑年十五。能不憂愁有幾時。

無題

花黯橫塘有路通。斷腸送送畫橋風。鴛鴦祗宿雙生樹。鸞鳳那栖半死桐。
楚峽雲歸芳夢散。秦淮月在故樓空。別來聞說新妝束。學得蛾眉幾樣工。

旅次書懷

幾年不種漸谿田。覺我疎慵更勝前。嵇阮豈須經世策。巢由何用買山錢。
莫愁湖上春携酒。長樂橋邊月泛船。惟有古懷消不得。臺城衰柳白門烟。

正月十三夜同王若觀伎共用來字

倡樓羅薦開。急管促行杯。花氣衣香奪。蟾光燭焰回。舞飛雕砌雪。歌落綺
窗梅。不盡橫陳態。猶期三五來。

題王野城南居

瓢笠高懸壁。交游久絕踪。門生當徑草。窗度隔城鐘。野老期看竹。山僧就
結冬。今朝秋氣爽。戶外數晴峰。

送劉休淵歸中都

白下憐君失意頻。濠梁歸路聽鶯新。數家古市低攢樹。十里平蕪遠見人。
河上虹分官渡雨。城頭花壓驛樓春。交游已自隨金散。羸馬蕭蕭獨問津。
上洋道中

帶雨片帆搖。人烟隔浦橋。築圍防海嘯。補屋避江潮。地沃征徭重。年豐稻
蟹饒。時依村市泊。機杼徹寒宵。

寒夜與范汭過黃習遠蕭蕭齋宿得人字

薄算投君宿。維舟先問隣。村烟寒結屋。山犬夜欺人。居以違時僻。交因遠
至親。蕭蕭松月滿。款客不妨貧。

秋思

蒹葭霜冷雁初還。歸夢如雲只戀山。一夜潺湲西磻雨。夜來秋氣滿人間。
訪沈逸人不遇

宮人斜

沒骨埋香却。怨誰化爲黃土出花枝。開時或得君王惜。猶勝深宮未見時。
鷺峰寺寄友人

水漫長橋深復深。寺門花密柳陰陰。尋余只在鶯聲裡。不聽鶯聲何處尋。

過田家

馬蹄撲索客心懶。十里無人煙火斷。僕夫驅馬入田家。老翁出戶能相款。
草中角角雞哺雛。房內呱呱兒新誕。舍有餘糧可接荒。陂多積水能防旱。
借問客子來何方。炊黍蒸梨羅酒漿。話餘桑柘陰移徑。坐久牛羊走上堂。
長男輸租入城裏。傳聞礦稅天下起。舟車牛馬皆有租。老夫八十眼所無。
我言老翁且莫苦。淮南還有李開府。謂淮撫李公三才

閏九月燕子磯登高用寒字

閏月蕭蕭萬木殘。危磯裊裊壓江湍。却登高處萸重佩。尚有餘秋菊再看。
浦口雲深帆影暮。石頭風急雁聲寒。松亭蘿磴閒行遍。正近斜陽莫倚闌。
同曹學佺過宿碧峰寺愚公房得風字

入寺昏烟斂。雙橋竹磴通。僧歸殘磬裏。客夢亂山中。燈暗牕沾雨。枝喧鳥
墮風。他鄉寥落夜。語笑喜能同。

春夜有懷姑蘇

潮落秦淮月映沙。金閨有夢在誰家。不堪暮雨楓橋別。無賴春風茂苑花。

舟蕩漣漪歌子夜窗臨睥睨聽啼鴉分明舊事渾如昨過柳經梅幾歲華

春遊曲

細雨濕春泥流鶯幾樹啼東風淮水曲落日長干西夾道看馳馬圍場下
鬪雞倡樓今夜醉月出管絃齊

雪浪菴看桃花歌呈恩公

白石累累如雪浪青山叠叠疑屏障孤菴結處絕人尋千樹桃花深又深
吾師講散僧徒暇或行或坐桃花下悠然花下悟真機落花偏著定時衣
處處飄來天女散紛紛銜出佛禽飛如此春山誰獨往城中人有山中想
礪戶踈鐘出谷遲石橋流水和雲响幾曲雲林望不通惟將流水世人同
徐穿鳥語枝邊路傳過經聲花裏風步步留人春不盡掩映嵐光無遠近
池上數株昨夜開舊紅幾點逐沿洄禪關自與仙源異莫誤漁人不再來

廢南院看桃花

院廢花猶發遊人爲此過荒蹊侵野水露井簾新莎開處誰扳折種時曾
綺羅惟餘聽曲意誤入鳥聲多

過林子丘茂之兄弟新居

雖然不出郭幽僻似郊墟兄弟無餘業閉關好讀書取山開北牖留月廣
前除賴有曹評事常過問索居

送姚鼎梅

寂寞古城陰孤舟淮水潯看君不豫色倦我遠游心別路生春草還山多
苦吟只將疎豁意歌入浦雲深

出龍江關遇中州張民表遂與同舟得歸字

河橋纔過雨關樹又殘暉出郭忽已遠逢君竟似歸蘆邊舟欲發沙際語
相依且莫乘流去空江暮靄微

望亭舟中感懷

水國蠶桑早春山蕨笋肥誰憐行路客着盡離家衣村犬迎舟吠田鳥繞
耕飛悠然望遠岫却羨暮雲歸

送張朔少遊燕

世路難如此問君何處遊燕京方逐客塞上正防秋沙磧長風急關門落
日愁將軍油幕裏誰有接應劉

青谿泛舟偶訪友人

青谿有九曲。曲曲見鍾山。山色長如此。水流終不閒。却于日暮發。好趁月明還。之子門臨岸。維舟且扣關。

秋日寺居柬王僧劭

檐樹涼颼急。庭蕪白露溥。登臨爲此始。物候又驚殘。寺靜秋吟好。林深夜坐寒。仍多禪侶過。澹語更成歡。

秋夜與俞安期宿烏龍潭吳家水亭

潭光與月色。清徹一園中。陰過臨城樹。涼當隔岸風。窗虛涵若水。亭敞坐如空。幽極不成寐。高懷有客同。

與曹學佺林古度過孔雀菴訪韞輝上人

竹日下清暉。林深一徑微。蕭然瓢室靜。可息道人機。汲井鳥衝出。開籬蝶繞飛。復過隣寺去。留與月明歸。

離夜

白露塗蘭堦。秋燈耿離席。風景淒以清。情思紛如積。隴庭樹光送。君立門隙。昨夜秦淮月。今照板橋客。

贈于納言文若

還治出西華。春城散曙鴉。俸支常不足。客到竟如家。古思澹流水。閒情賦落花。朝朝垂手版。山色正當衙。

殘臘阻雪雲陽客舍

鐵甕寒潮凍不流。雲陽風雪旅人愁。客心不與年爭急。且緩歸程一日舟。

寄陳使君抑之

海南無雁亦無秋。萬里何人寄遠愁。寂寂孤眠淮上月。憑風吹夢到羅浮。

浦子口作寄吳隱君夢暘

潮滿金陵渚。風高浦子城。烟帆來楚色。霜葉下秋聲。水國開千市。天家駐五兵。旌旗搖列壘。鼓角動連營。海汛防南服。邊烽接北平。壯心空宿昔。逸思尚縱橫。幾逐漁樵侶。常投草澤行。撈蝦沙岸淺。牧豕竹坡晴。旅食遊應倦。秋衣授未成。平山獨可眺。眺遠寄離情。

癸卯元夕曹能始席上咏夾紗燈屏得花字

火樹當筵出。燈屏繞席斜。透迤一片影。匝九枝華。薄素流明月。層波浸百花。龍膏然作霧。雀彩散成霞。曉戶鶯窺鏡。春牕蝶誤紗。盈盈空內外。瞰客若爲遮。

早春水閣

昨夜秦淮春水生。朝來合岸有波聲。春陰不散餘寒在。雪積鍾山一片明。

與喻應益言別

楊柳河橋日向新。空江無處不通津。留君且過花時去。共泛青谿曲曲春。

春宵曲

巖城禁苑漏傳稀。戚里侯家啟夜扉。花裏歌聲驚宿鳥。池邊水氣怯春衣。

閩中與吳元翰過馬季聲家酌

佳人笑語風吹過。公子留連月送歸。醉帳沉沉芳宴散。夢魂應繞碧雲飛。

多君新釀熟邀我客中間

多君新釀熟。邀我客中間。剖橘香生手。銜杯暖泛顏。敗藤縈格下。爭雀墮籬間。

夜夢還家作示林古度

晨光銜北牖。攬衣庭前步。嘿念戚無歡。心中綴想慕。君問想何為。夜夢還鄉去。

戲弱子緣堦驚攀枝不及花牽衣適迎路山妻飯中厨含淚復含哺入戶

戲弱子緣堦。驚攀枝不及。花牽衣適迎路。山妻飯中厨。含淚復含哺。入戶

相顧

理殘機行園。摘寒瓠在昔。怨貧賤歸來。甘荆布緒亂語難終。神悸遂驚寤。想像反側際。依稀情景具。愴愴心內酸。歷歷為君吐。君亦道路人。無語空相顧。

冬至夜集曹能始園亭觀伎

佳候要佳麗。山齋啟算扉。入園驚荔發。窺瑄見灰飛。梅亂歌中落。春爭笑裡歸。橙香寒麵面。桂氣暖熏衣。粉壁釵橫影。雕窓燭散輝。不堪絃管歇。殘月尚棲幃。

偶書閩中風土十韻寄金陵知己

風氣南來異。行行歲月賒。梅香逾五嶺。猿響類三巴。時見蠻烟黑。還驚左語譁。舟中喧水碓。城上出人家。荔子家家種。榕陰處處遮。居民晴着屐。市女晚簪花。短蜮能伺影。雌魚會噴沙。蠟房經雨吐。石蛙入春華。劔浦龍何在。螺江事可嗟。好游非向子。錄異是王嘉。鄉信難逢雁。歸期易及瓜。吾生從汗漫。世路更無涯。

過曹能始家作

非我頻相過。知君日日閒。家貧能愛客。官冷好遊山。待月時同出。看梅昨

共還斜陽照深巷。又見竹門關。

除夕曹能始宅林茂之弟彥先同賦 癸卯

今宵愁轉劇。賴子倍情親。聚飲憐家慶。分權念旅貧。春添壚氣暖。梅照燭花新。共惜須臾別。明朝隔歲人。

元旦書事 甲辰

閩中風景麗。元旦百花開。有岍皆縈草。無波不染苔。樹光搖粉堞。雲彩照金罍。濃黛新年點。春衣隔歲裁。夜鑪藏宿火。曉燭剪殘灰。袖裡分餘蕙。釵邊骨落梅。松枝當戶插。椒氣拂牕來。正好隨權笑。那知客思催。

人日立春林民部宅觀伎

雙節值新年。東風裊伎筵。土牛官鼓逐。彩燕內人傳。杏子裁衫薄。梅花點額圓。歌深眉黛蹙。酒重臉紅妍。香霧迷窓鳳。金屏影柱蓮。尚書舊東第。賓客喜重延。

集林光祿新第得花字

到戶塵喧遠。開門蕙徑斜。圖雲流礙棟。刻鳥立窺紗。帶筍移隣竹。栽枝寄別花。殘霞藏宿雨。弱柳墜栖鴉。亭敞分歌伎。池清漾釣槎。誰言光祿第。定

是石崇家。

贈粧春者

高臺望若仙。出色異人妍。南市重圍壓。東方千騎聯。衣邊淨白彩。髻上惹春烟。更恃衆憐意。歸嬌女伴前。

武夷小桃源訪劉道人 甲辰暮春能始茂之同游

崢嶸入陷石。石徑轉逾窄。劃然洞門開。斜光一道白。龍湫流暗穴。鳥篆繡苔額。窮源有古村。二三避世客。避世非避秦。栖心鍊精魄。春田自耕刈。衣食無需索。風動棕花落。雨過藥苗摘。鶯啼林木秀。犬吠葺空碧。居然衆山中。遂與衆山隔。坐久恐迷誤。歸路誌前石。白雲洞口深。似杜重來跡。

榕城小妓奇奇歌

奇奇十二髮垂肩。凝伸膝上誰不憐。鴉頭髻。梳望如墮。杏子衫。新紅欲然。市門半面窺人慣。門前潮水東西漫。阿爺歡喜阿娘嬌。東家妬殺西家羨。六月南風荔子紅。斜柯輕立踏如風。八月西風龍眼低。今年攀折與枝齊。年紀雖小齒清歷。漢語吳歌聲的的。劉家碧玉未須論。越客明珠應不惜。借問春來幾樹花。雙拋橋畔是兒家。

登釣龍臺

秋色延高臺。臺荒廟亦冷。兩三樵牧兒。投石試深井。

度嶺作

谷口鐘聲度嶺微。嶺頭嵐氣散朝暉。江山處處通鄉路。只是遊人不得歸。

宿曹能始吳客軒題壁

園亭臨浦口。門巷暝烟深。池岸波新浴。花谿草乍侵。雲來窗上濕。月過樹邊陰。誰謂留吳客。余將起越吟。

歸宗寺

路繞鸞溪去。復迴鵝池聞。說右軍開山僧相遇。衣裳濕。雙劍峰頭看瀑來。

登五老峰望彭蠡湖歌

甲辰仲夏梅子庾喻宣仲曹能始林茂之

同游凡半月

適度含鄱口。來登五老峰。千盤萬剝無人跡。雨過泥腥見虎踪。一徑孤懸五峰背。烟嵐五點濃。如黛壁面起。今蠹相向石顏登。今詭萬狀履觸雲生處。身齊飛鳥上。霞綴屏兮成錦。霧瀾谷兮如漲。峰頭霧雨峰下晴。一湖樹夕陽明。波聲直撼鄱陽縣。江色遙分湖口城。憶昔揚帆彭蠡左。湖心迴

壓看將墮。今來頂上看。湖光湖光射眼白。如霜不知浮蕩蒼翠表。只覺微茫衆山小。林交陰兮青兕啼。草丰茸兮故步迷。遊人今夜何峯宿。遙逐鐘聲度水西。

晚投黃龍寺慧宗上人房

幾處禪林聚似村。嶺頭風雨礪頭昏。千枝燈影僧初放。一派經聲客到門。

師子巖

石罅置檐楹。高低縱復橫。臨深暘幽意。極嶮盡遊情。火照潭心影。經傳洞腹聲。際眉巖電射。繞足礪霓生。潛怪禪能伏。啼鼯狎不驚。欲窮前勝處。無路若為行。

潯陽張侍御宅詠伎

房櫳花色色。池館月盈盈。古服仍椎髻。新粧忽曼聲。聞香方覺笑。辨珮即知名。上客莫言醉。分歌緩夜情。

送林古度

分手寂無語。殷勤獨此心。夢於遊處得。情向別時深。廬嶽雲初起。潯城日半陰。孤帆卽千里。昨夜在東林。

新秋建安王半隱園應教二首

坐望林巒隔。行分島嶼遙。蹊崩橫臥柳。岸闊接平橋。微雨驚雷散。輕炎入樹銷。豫遊屏侍從。疎豁似漁樵。

薄葺登臺望。西山翠滿欄。湖雲屯岸宿。松露滴衣寒。萬井炊烟歇。千家市火殘。笙歌引前路。花密出猶難。

晚登九華山

望江亭望晚。江晴颺秋兼。風水聲寺隔。數峯猶未到。禪燈幾點翠。微明

登天臺峰宿

峯離寺二十里山之最高者

蘿磴松崖幾百層。猿攀魚貫始徐登。昨朝望處今宵歇。巖下雲埋入定僧。

別九華山二絕

寺前秋淨萬峰閒。正好尋山又別山。谷轉谿迴留不住。水聲相送到人間。複嶺重巘出路賒。漸看龍口有人家。行行數里猶回首。秋滿山蕎麥花。

舟泊石頭城

依舊城邊明月輝。城中蕭索故人稀。南遊日望東歸急。及到金陵不是歸。

西湖春遊詞七首

堤暖百花齊。湖春萬柳低。管絃初沸日。羅綺已空闈。上巳連寒食。車輪間馬蹄。遊人爭向處。多在斷橋西。

湖水碧粼粼。還疑洧與溱。褰裳臨翠渚。踏艸及芳辰。合岸花薰暖。雙堤柳夾春。今年風景好。直爲遠遊人。

橋外卽當壚。樓陰碧樹扶。水筵移岸酌。越女唱吳歎。一徑穿孤嶼。重光帶兩湖。匝波舟楫動。處處起鷗鳧。

越女善拏舟。吳姬解權謳。尊低芳樹下。人擁古堤頭。香醞尋仙客。靈峰問楚流。花時無遠近。分日出城遊。

晴光上柳條。結伴戲花朝。歌近舟沿岸。人開馬度橋。雷峰看塔迥。葛嶺弄泉遙。日暮爭門入。衣香滿路飄。

新堤楊柳斜。遊冶肯還家。珠彈光流月。春衣色勝花。幕遮芳艸路。騎並美人車。何處菱歌起。仍憐似若耶。

遊路背湖分。林陬復水濱。年傳秦代石。人拜宋時墳。塔影雙峰見。松聲九里聞。不知天竺近。香氣藹成雲。

過吳門訪沈野范汭携酒至因賦

臯橋通市外。鴻墓卽城隈。芳躅君能繼。衡門客到開。藥香餘石臼。茶綠泛山杯。鄰圃花迎發。東家酒送來。池萍初點絮。堦筍欲穿苔。誰復尋行跡。荒蹊不剪萊。

酬何璧

少年爲志在仇恩。老大銷磨百不存。寂寂孤窗風雨夜。因君知我與君言。

寓范汭家過其友卞潤甫新居

綠樹陰相接。過君不出門。少年能淡薄。高臥動寒暄。開徑多隣客。移家只故園。曉涼聞汲響。鑿井在籬根。

贈王德操居士

家在半塘住。常聽虎寺鐘。持齋坐孤館。禮塔向高峰。姓字能藏市。妻兒相賃春。寥寥梁孟後。于爾繼芳踪。

遊天池寺

誰家墓道朔猶新。便見禪宮跡日陳。寶地也聞歸別主。青山終是屬遊人。殘僧寥落他鄉乞。古佛荒涼野魅隣。惟有泉聲秋可聽。苔衣漠漠石磷磷。

送方子公

行止因人定。倉皇爲計非。出門雖異路。貧賤自相依。雨濕秋衣薄。風吹病骨微。昨宵曾宿別。鄉夢亦同歸。

舟泊天門山寄金陵故舊

際晚帆投岸。蒼蒼暮靄平。別愁當月滿。鄉夢趁潮生。牛渚今宵客。鳩茲明日程。漸欣江路少。得近故山行。

到家

渡口尚餘景。喬木故鄉陌。誰云客不歸。今歸轉如客。村犬吠路隅。室人避門隙。入戶恍有存。依然舊四壁。始歸人意新。隣里皆來覲。交譴我何言。誰復閔行役。興念及殤兒。生未諳行跡。夢寐何由通。徒聞人所惜。別時種園樹。過墻盈幾尺。且復息其陰。淚沾衣上碧。

秋日雜詩

新穀望將熟。無田安可希。飢驅兒女去。同拾遺穗歸。鳥雀爭喧啄。不忍相逐飛。夕春朝作飯。朝春夕作糜。賴此保朝夕。我心實傷悲。爰思古之人。貧賤甘如飴。牧豕上林苑。逃耕蒙山陲。道勝聊自慰。欣詠衡門詩。

過汪隱君道會

適渡豐谿水。隱隱松明山。松色自幽映。溪聲復潺湲。主人尚高臥。童子啟柴關。眺聽且延佇。落日半林間。

貧居

釜裏生魚甑裏塵。非關久雨却關貧。床頭惟有梁鴻傳。間誘荆妻作古人。

閒思寄林古度

一與西湖別。春風兩度來。曾栖山寺裏。日日待花開。

早秋齋居

早晚涼風至。蕭蕭聞竹竺。今年無客思。又有舊遊懷。

喜郭昭自廬山見過

荒村歲暮誰相問。惟有籬花慰索居。遊過山川常在夢。別來朋舊久無書。秋風鳥雀喧禾黍。落日牛羊徧里閭。卽此蕭條空館夜。與君相對話匡廬。

宿吳公勵石壁山房

山館雨聲秋。秋燈照石樓。興因清景發。宿爲故情留。往事言難盡。涼風吹不休。少年行樂處。多夢秣陵遊。

送劉小小爲尼

羅衣脫却一披緇。却悟紅顏有歇時。學拜纖纖方禮佛。隨班嫋嫋乍從師。忽驚形影燈前異。猶賸繁華夢裡知。寄語舊家諸姊妹。年年空爲落花悲。

寄曹學佺

幾年山水共閒遊。無日吟詩不唱酬。一臥故園春又暮。棟花零落漸谿頭。

喜雨

沛然時雨來。芄芄禾黍起。我固無所望。亦爲鄰里喜。晚向西軒眠。谿雲滿窓几。明日釣潭側。應深幾尺水。

暮春谿居二絕句

門前梧柳長新圍。雨暗空林客到稀。幾欲持竿谿上去。灘頭昨夜沒魚磯。柳岸沙潭風景多。晚晴新綠映春波。漁舸好泊深深處。棹月歸來半夜過。

寄曹能始

聞說官閒心亦閒。馬蹄日出不知還。落葉滿城秋似水。家家樓上有鍾山。

暮春偶過山家

山村處處採新茶。一道春流繞幾家。石徑行來微有跡。不知滿地是松花。過吳太常山居

只在花深處。恒來亦費尋。書聲聞竹色。鶴夢冷松陰。時過隣僧飯。仍多野客吟。冷然算空碧。清磬出春林。

月夜自寶應泛舟至秦淮

湖月忽來照。蕭然水樹明。權沿堤影直。星過浦光橫。家遠秋多夢。年豐夜可行。前程何處泊。雞唱是孟城。

姑蘇曲

寶帶橋邊鵲啄花。金閨門外柳藏鴉。吳娥捲幔看花笑。十日春晴不在家。

春日過馮祭酒孤山別墅

池館青春好。泉臺白日辭。梅香曾賞處。柳發獨攀時。湖舫遊新主。賓階生旅葵。野烟沉酒徑。山月冷歌帷。鄰起山陽遂。庭間謝傅棋。還聞有遺令。開閣散諸姬。

西湖子夜歌八首

湖女二三月。相將戲水涯。新堤看楊柳。舊堤看桃花。新着杏紅衫。試騎赭白馬。馬驕堤路窄。急爲扶儂下。三橋當路半。正好與郎期。湖水原無信。郎來那有時。

南峰望北峰如歡。又如儂。何當雲霧合。兩峰作一重。渡頭人眼衆。船開不敢要。慣知儂泊處。不過西泠橋。外湖歌折柳。裏湖歌採蓮。聞聲不相及。意緒風中傳。西陵花深處。舊是情人路。湖船不出湖。願歡尋故步。悔寄孤山梅。悔折斷橋柳。兩地本無情。郎心那得久。

過西湖懷曹大參學佺

每憶同遊處。悽然起舊懷。蘭舟曾泛泛。春鳥正啾啾。幾訪孤山隱。常持淨寺齋。苦吟花閣曉。泊月柳橋佳。此別經三載。聞官進兩階。旌驂臨蜀道。賓客散秦淮。出祖龍江日。嗟余不克偕。

將之廣陵過別林古度留小酌

客至摘籬豆。一尊相對吟。山光當戶冷。秋色入門深。卽此寒燈夜。兼之遠別心。明朝廣陵道。水岸但楓林。

禪智寺李本石宗衍同遊

月明橋畔寺。云是舊隋宮。磬發山堂寂。烟銷輦路空。旅懷深落日。古思入秋風。耐可同遊在。看碑衰艸中。

法海寺

野航時可繫。林寺晝猶扃。古木無年歲。清陰滿戶庭。客來方禮磬。僧坐但翻經。烟起炊茶竈。聲聞汲井瓶。窓過湖鳥白。簷挂葉蟲青。蔬飯欣然飽。徐步遠堦。

吳山人夢暘

夢暘字允兆。歸安人。生短小。稟性强直。鄉里有不平事。奮袂剖陳。不避權貴。若上人畏而遠之。薄游長安。與宋西寧張聖標爲文酒之交。西寧沒策。蹇三千里。經紀其喪。諸公皆多之。好吟詩。詩不就。竟夜不交睫。苦思刻鏤。必得當而後已。知音律。善度曲。晚遊金陵。徵歌顧曲。齒齟牙落。猶嗚嗚。按拍好事者。至今傳之。允兆嚴於論詩。雌黃不少。借常集汪景純家聽歌。與程孟陽限韻爲數絕句。互相歎賞。又卽席送潘景升約爲短歌。孟陽詩先就允兆擊節。自取其草。碎而嚙之。其通懷樂善如此。

和陶飲酒二首

何悔不學劍。豈云不上書。歸來坐涼月。綠水周吾廬。庭草一以新。知是春風初。故人惟故心。獨不謂吾疎。相向宛夙昔。豈不懷舊都。舉目盛雲物。安

能無歡娛。

狗名視逐末。錙銖爲重輕。置身等草木。安得無衰榮。華屋歌未闌。白楊聞哭聲。向平果何意。問死何如生。

和孝若湖上作

浩渺湖之陽。信爲子所止。氛濁一以屏。冲襟淨于水。涼風四面來。暝色從中起。茫茫觸無情。情來莫爲理。寧以終古懷。委之波靡靡。

孝若留飲短歌

蘋洲之上何所爲。向君索酒酒勿遲。今夜不醉今何時。虛檐燭短風雨苦。君屬我歌君可舞。座中無言心各許。主人胡不進樂方。語及喪亂哀國殤。使我罷酒色不揚。更欲片言追大雅。數十年來誰作者。朱絲無聲雙淚下。君不見。吳生輕作萬里人。五年三踏長安塵。明朝告別無可陳。我道今人賢。將恐君掩耳。我道古人賢。不知古人死。但願君家有酒。吾且止。眼中依依二三子。

暑夜孝若携伎飲長橋上同諸從踏月歌

明月滿地寒如霜。踏歌出門氣揚揚。登橋仰面天蒼茫。千峰萬峰挂女墻。

酒星客星爲低昂。老夫興好君相當。阿渾阿咸底復狂。袒跣大叫呼索郎。
長鬚仡仡催行觴。甘瓜碧藕壓酒漿。其時妖冶誰爲將。黃衫宕子青樓倡。
絳紗引出差飭粧。麝魄狼籍脂澤薈。嬌歌忽轉嫵媚娘。前溪采菱音旋亡。
入宮變徵吾未皇。坐來白雲塗衣裳。鬢毛刁騷肌骨涼。烏棲月黑還洞房。
博山烟滅燈無光。蟋蟀當戶逼人床。歡樂繼之慨以慷。悄然無寢夜未央。
徘徊中庭何所望。

夏玄成邀集中園歌

君胡爲乎衡門下。偃臥中園號桑者。滿牀圖史安得貧。鴨闌鶴柵供蕭灑。
比鄰大賈誰過從。柴棗籃輦多從容。生徒散去亦不索。退院老僧方打鐘。
我獨來尋一二友。如君悠悠吾且朽。烹葵剝棗饒盤餐。不妨案頭權設酒。
有酒便堪酬酒徒。白頭能傍酒家胡。人間何許快意事。大叫一擲成臬盧。
清商舊譜新聲續。還唱江南采菱曲。曲聲半落風雨邊。人影蹒跚滅華燭。
今人之樂樂未央。古人一往誰能將。我懷古人色凋喪。出門空覓江都相。
荒丘野蔓誰家宮。玉鉤斜上吹淒風。欲將衰白變美好。八公山上皆青草。
何如諸公達者爲。使我一飲成淋漓。客散吾留雨如注。好君正在蕭颯處。

還將舊事仔細論。惟有邗江之上潮來去。

同潘景升顧嘿孫集湖上代妓作

妾家白門楊柳下。楊柳當年繫郎馬。又住錢塘楊柳邊。楊柳仍藏烏啞啞。
生憎啞啞烏。逐郎郎在湖。聊復爲郎提玉壺。泛月月未起。蕭蕭一湖水。向
月人人道有情。未見情人爲情死。君不見。白使君。蘇使君。一呼小蠻一朝
雲。今日妾歌懊惱詞。借問使君聞不聞。無端再唱金陵樂。若個天涯不流
落。好認西湖是妾家。南屏山前多藕花。藕花折郎手。花飄不得藕。心知郎
有他。爲郎來勸酒。一訴姊妹知。不如訴郎友。將尋小小過西陵。月落天低
江渡口。

送張去華走哭汝陽王胤昌宮庶

君不見。南州孺子辟不起。一朝徒步走千里。英雄但可輕浮名。那可無心
報知己。張郎心事亦復然。絮酒持將哭泉裏。自言不受他人知。惟有汝陽
王庶子。出門滿路吹蒺藜。眼底誰爲此人死。更將肝膽何處明。一片悲風
咽汝水。

重過友人花下歌

萬壽言集十一
憶昔曾醉故人家。滿檐春雪吹梨花。花開花落今幾度。爲問客顏得如故。故人老去猶故心。折花憶我相思深。重來看花花益好。可惜看花人盡老。此時花裏春風顛。此時酒裏莫論錢。當杯但畏花欲落。且向花前同醉眠。若過君家能醉殺。便須埋我在花前。

辛丑冬曹能始過客孝若壘中因徧遊吳興諸山歌以美之

君胡爲兮樂吾土。臨水登山吊今古。故鄣城外君回船。詩中不吊陳霸先。關中布衣呼不起。挂瓢堂中君獨倚。悄然憂來不可輟。長謠短詠皆奇絕。凍雲不收天雨雪。雪皎天青照顏色。其時值我不出關。今年相趁控雀還。勸君人官官復閒。蕭蕭蕭蕭山水間。嗟嗟古人骨已折。今人誰與友。心憶臧三夢。吳九不別茅。維重携手。山水風流或在茲。一日遂爲君所有。

相逢行別朱大復比部

請君爲我止。聽我相逢行。相逢恍若昧平生。顏色可疑心事明。但云兩人天所成。安能百歲無合并。眼中不覺鄉國遠。一日携手長安城。因之齒牙及餘子。臧三無聊董大死。饒他獨好蓬蒿人。復使區區入君耳。與君各抱龍門桐。朱絃九絕非不工。今君將使大雅作。吾亦爲君揚。風洋洋入人

無上下。君方在朝吾在野。縱君寡合我更窮。忍向悠悠希作者。作者有如君。吾何怨幽獨。卽來遺我珠十斛。用之字字荒年穀。無端別擲書一行。我正悲酸不能讀。直從野夫論時事。其間奚止三痛哭。野夫痛哭思上書。憂憤不知臣分疎。君謂斯言胡草草。在君言之猶患早。況乃襦生衣褐衣。眇小誰容言是非。所惜爲郎不賜見。豈其遂忘鉅鹿戰。一論往事心膽寒。更無長策求治安。皇華漫詠日出處。鯨鯢晝夜興狂瀾。相沿猶號女主國。叛逆底須勤縣官。及今所恃在天險。慎勿苟且遺三韓。斯言特地向君吐。知君矯矯存忠肝。嗟嗟壯士無由得。瀕海經營湯信國。其時訓誥絕島夷。卓矣高皇先遠識。乾坤全仗開闢功。億載縣縣由帝力。近日曾頒罪已詔。俄頃河山盡增色。明朝送子去朝天。自今更始理必然。人人建白惟恐後。中有幾人如子賢。世上無非子能事。不忍使子名空傳。野夫高枕娛白日。何妨音響相周旋。所思在此勞夢寐。合眼已覩中興年。夢來原識到家路。參差芳草衡門前。

爲鍾清叔題薛五蘭卷

薛五嫁人苦不早。皆知倡家擅技巧。寫生乃是第一技。所見無如此卷好。

蕙質蘭心有深寄。葉葉莖莖吐幽思。其餘點綴亦復佳。剡藤數丈披清氣。畫兼題詠頻致余。余亦每呼薛較書。居然獨立脂粉外。薌澤全拋絃索疎。通國名娃出其下。仍嗟舉世無知者。眼中鍾叔比鍾期。此卷祇應遺叔也。叔也有情情復起。我題情語情如水。枉教夢到湘江頭。湘江水絕蘭枯死。

捕魚詞

錢唐蕭蕭暮潮響。雪片打船天蒼莽。此時江心魚不上。漁郎視魚如在掌。身躍水底勝落網。手擎一尾一尺廣。回身落水水幾丈。俄頃出沒魚穰穰。起立船頭髮蔽額。不着衣裳還打槳。

同周叔隱夜坐

罷酒尚寒色。頽然擁衲衣。洞簫吹雨歇。殘燭映江微。道路人將老。鄉園夢不違。連朝常少睡。支枕問清暉。

東生湛園

道路談丘壑。惟于此地親。了無塵事到。各有土風陳。池集常來鳥。花窺將去人。燭銷仍繾綣。半為惜殘春。

錢簡栖月駕園

所欣連夕燕。世事不魯論。得與時人遠。常如往者存。異書抽秘府。嘉樹看鄰園。忘却春將半。飛花吹入門。

邀諸友集顧所建湖上水閣

相趁探春去。棗尊一為携。花繁那辨樹。湖蕩不分堤。老益希新好。閒能補舊題。酒家知在否。烟雨段橋迷。

陸纂甫至

北歸重得見。未暇道相思。國計今如此。吾徒何可爲。暑禁寒雨積。老任落花吹。賸有銜杯興。君還進茗糜。

對客

舉世悠悠者。都非君所從。有人相許可。垂老一從容。小雨披群竹。清霜勁老松。別無相對語。墻角遠聞蛩。

中秋日趙文度過小飲

相逢說牢落。況乃值清秋。滿地已黃葉。他鄉應白頭。酒邊愁較緩。身外老堪休。爲贈青天月。須君盡日留。

姚百雉見訪

一杯綠爾設。心曲直須陳。花下何由老。吟邊那得貧。史無磨鏡事。客有賣漿人。似此誰聞得。惟應向我頻。

送黃貞父北上

期君向所負。今出果何如。明主爭爲用。高名善自居。有身須事業。無意卽樵漁。朋舊同聞此。長安不寄書。

送胡孟弢邑博之沅江

携手情無極。茫茫此別何。一官猶俎豆。滿地已干戈。畏路身難定。騷人怨自多。可堪寥落思。木葉洞庭波。

撥悶對翁晉簡義公

莫遣秋來興。陰晴坐鬱蒸。茶鐺虞水竭。書帙儘塵凝。老眼何由放。諸山久不登。因之懷舊好。幾個白頭僧。

都下寄龍君御

及此賜環日。敢遺招隱詩。賈生流涕易。嵇叔入官遲。治粟緣時急。藏書許客知。武陵花不落。恐誤出山期。

得曹能始白門書却寄

務求千古合。寧與一時乖。此語無人道。安能不爾懷。閒情陶顧渚。舊夢怯秦淮。所可遙相慰。春來風日佳。

留贈老僧

聞師日靜坐。煩惱靜中除。燕子隣家去。僧雛別院居。嶺雲歸復盡。山果落將疎。猶有相關事。溪頭值老漁。

禮愛師

幾度尋師到。茫然空自回。所聞無一了。安用此重來。江月爲心印。庭花儼手栽。尚勤諸弟子。香火影堂開。

過嚴寅所村居

相期殊有謂。相見且無言。不使錢刀盡。安知意氣存。菰蘆聊四戶。燈火自孤村。最好交游絕。諸山在葦門。

同翁晉還自吳門志別

明朝子解去。昨日送茅維。芳草猶在望。素心還自持。旅魂花片片。人影鬢絲絲。近日情如許。那爲萬里悲。

罷讀

殘書且罷讀兀坐夕陽軒睡去入松影醒來通鳥言身閒衰老骨事少暮冬邨忽作窗前雨蒼蒼雲氣屯

飲翁升小樓同翁晉作

開尊誰是主但飲不須疑密坐皆無次同來似有期谿山留客易風雨下樓遲別後還相憶梅花悵滿枝

湖上同晉叔嘿孫作

心賞無過杯酒間良朋難合復追攀重尋往事渾如夢好藉清談一解顏秋杪細聽將墜葉月斜猶傍未沉山請看臨別蕭蕭影幾度殘鐘拂曙還

楊仲明見訪有贈

村僻相將學課農猶煩朋舊遠過從出門覓取誰家酒隔水聞來何寺鐘往日姓名疑劍俠近來鄉曲號書傭自誇興到還多事手植荒庭一老松

甲寅新春對客作

瀉盡流澌春氣溫一溪新漲舊柴門野僧同住權為寺水鳥孤飛不出村瓦鼎祇應烹臘雪藜牀最好傍朝暾過從總在滄江上安有平生未吐言送戚不磷之內黃訪鄧遠遊

野夫元是客中身復向離堂易損神鳥哢一聲林已夕花吹三月路無春黃河不接黎陽樹青草偏生楊子津非爾中年急知己那能輕作渡江人

散社後示諸子兼辭酒會

蘇晉長齋列飲中留連聊與故人同生憎情劇三眠柳徒自身輕半死桐細草忽隨春浪碧遠山渾入夕陽空無端覓得桃花枕一覺悠悠荅書公唐僧晝法師嘗作桃花石枕歌後焚詩於瑤山寺

過張孟育話舊

讀書無遇不能休一話窮途客自留颯颯枯枝霜滿樹微微殘臘夜登樓二三知己皆黃土幾箇生徒又白頭如許老懷那遣得到門湖水日悠悠

過愚公虎丘寺

烹葵剥棗儘相關坐到昏鐘始下山弟子可知皆白足老夫焉得不蒼顏花飛日日何曾掃柳長村村只未攀路黑出門燈肯借画船簫鼓幾家還

巳酉新春二首

自擬今春懷抱開林扉時復掃荒苔沙頭鷗鳥休飛去野外梅花許折來多少誤人空識字從容留客不銜杯題書徧問諸名勝肯入廬山般若臺

百年何負草堂靈。詎使尋常問客星。不種公田仍減產。尚無飢色喜添丁。
人間安用屠龍技。方外曾携相雀經。空手出門風雨至。也須簞笠問樵青。

秋草

八月幽并百草黃。還聞一曲奏清商。關河今夜皆寒色。陵寢前朝但夕陽。
久客自然迷道路。後時能不畏風霜。吳兒莫說漂零易。未到邊頭古戰場。

別黃伯傳

但作尋常別。不作尋常語。夜深江月來。還疑未別汝。

晚泊

老屋如巢居。亦復禦風雨。中有獨坐人。焉知不可語。

偶成

江上元無暑。涼風暑盡收。鬢毛吹已短。還度幾迴秋。

再過汪景純

金陵樂府杜秋娘。宛轉新聲隱洞房。林木盡飛江水咽。那教人聽不回腸。

送吳翁晉之官白下

爾從舍我客東阿。京邑論交長者多。今日草深丞相宅。莫因腸斷不重過。

送茅薦卿之官白下

籌國常存感慨餘。一身牢落鬢蕭疎。官閒勿謂全無事。前歲聞君有諫書。

送翁晉東遊

春風常在故人前。爲折新花媚別筵。惱殺當筵飛片片。可能吹到渡江船。

孝若將入山送之

山中多有好生涯。礪戶雲關不苦賒。試覓前朝避兵處。至今猶住幾人家。

送孫子長

國子先生較廣文。高名無地不歸君。長安難得官如水。只合題書寄白雲。

送汪明府擢水部北上

長安誰與說江湖。市上今無舊酒徒。祇是同曹茅水部。問儂曾見令君無。

送錢元英請告還鄉

託病還山意有餘。今人惟讀古人書。若然門外無隣近。願借溪灘學打魚。

送汪念潭

秋山萬疊赴新安。清淺溪流五百灘。誰向此中深領畧。問君何不早辭官。

古道菴望華亭

沿江遙指白雲隈，樹底空牀徧綠苔。今夜道人來借宿，前峰先有雀飛回。

陳山甫邀集楊姬華林館同賦四首

一片清江寫遠憂，新花還覓舊青樓。黃衫謝去諸年少，領略風光幾白頭。
四月探春春已過，他鄉行樂莫蹉跎。詩家文酒娼家會，絃索全拋翰墨多。
烟花四部舊曾題，迭變新聲拍按齊。聽到關情情忽忽，絳紗休妬翠眉低。
諸郎焉肯負尊罍，臨別連呼大白來。問我何曾高興索，滿街明月踏歌回。

王山人野

野字太古歙人，從祖仲房，以稱詩有聞。太古見時，習爲詩，稍長，弃博士業。從其兄賈江淮間，兄死，不能歸，入吳，說梁溪土風家于鴻山之下，與妻子舖糟不厭，死久之，詩益有名。遊于金陵，不輕謁人，貴人慕其名，訪之，累數刺始一報謁，蹇驢造門，稱布衣。王野投刺徑去，自選刻其詩一卷。晚年詩頗爲竟陵熏染，竟陵極稱之，爲評隲以行世。凡竟陵所極賞者，皆余之所汰也。子僧劭，字彥綸，亦能詩，早卒。有肫明草，其佳句如：陳匡左過飲，云峰冷秋雲白，墻陰晚照殘，永慶寺夜坐，云風輕松韻細，露滴月涼生，晚泊江上，云晚煙生浦澹，秋月出江孤，月云峰銜形似缺，江動影難安，人謂得乃。

翁衣鉢也。

金城禪院

林巒殘雪霽，淨土獨游頻。鳥似忘機客，山疑入定人。靈花飄不盡，古木自無春。坐悟衣珠在，空經累劫貧。

訪王伯穀

流水方窮處，茅堂空自開。鳥啼春樹綠，花發故人來。白日待將夕，青山去未回。題門吾豈敢，此意寄莓苔。

雨雪曲

大漠雪漫漫，胡風入箭瘢。平明沒馬足，半夜折旌竿。聲疊鼓鼙暗，光添劔戟寒。鉄衣三十萬，誰不憶長安。

越中送僧還舊山

折柳插瓶溪水灣，此方緣盡又思還。春花乞食雲門寺，秋葉翻經瓦屋山。雲起珠林封舊跡，月臨寶地憶慈顏。知君身似旃檀樹，已去留香梵宇間。

征夫怨

黃雲白草沒燕山，百戰空存兩鬢斑。不識征夫三十萬，幾人生入玉門關。

柳枝詞

江上春深萬萬枝。含枝帶雨盡低垂。不知此物關何事。今古令人怨別離。

寄叔祖仲房

燕趙歸來二十春。重游吳楚白頭新。如今海內無知己。到處江山哭故人。

宿空相菴

所嗟人世淺。託宿佛菴深。試看新生月。何如初發心。藤垂瓔珞影。松作海潮音。明旦那能別。幽情已滿林。

送洪獻吉還真州

秣陵還泊岸。瓜步又乘潮。離情似新月。明夜勝今宵。

倚樹

偶爾依芳樹。跣跡綠苔身。忘群鳥近坐。久一花開移影高。還下看人去。復回携書空。置石翻動任風來。

庭前坦步偶見岫山延佇以詠

偶憐山在目。淡立意悠然。落落泉春石。層層樹接天。半峰分夕照。眾壑共秋烟。將謂迷來徑。樵夫已過前。

出郭訪王叟園居

遙想棲託佳。春霽引坦步。鳥深墻外聞。花隔鼻先悟。入門及賓館。宛若下山路。蔥蒨清意滿。簡密幾叢樹。眾草冗不芟。存為蠢動寓。草木遂本性。愛物見平素。人靜池出魚。屋衰梁飽蠹。壁苔如画山。天然臥游具。園叟齒逾

老。似窟林間遇。內深真真寄。外淺備禮數。恍惚異世人。相對心疑懼。雖疑且盤桓。嘯歌日至暮。

山中隱者

野老自童稚。看君只舊容。清猿同嘯月。玄雀共巢松。靈藥登岸採。神書裂壁逢。相尋不失路。仙鹿有行踪。

江口待友不至

愆期昧所適。江口獨徘徊。看橋屢人度。立岸幾帆開。森漫秋潮上。飛鳴夕鳥來。坐沙頻畫字。烟樹日輪頽。

重陽前一日李本寧招集寶石山得來字

亂葉翻飛託草萊。眾賓分坐幾亭臺。天低煙樹千重沒。雲破江山一半來。皂帽受風先欲落。黃花候日未全開。歲時爭在人前好。多把茱萸看一回。

曹南宮學佺

學佺字能始侯官人萬曆乙未進士除戶部主事量移南大理寺正凡七年兩考轉南戶部郎前後十二年參議于蜀參政按察使于浙左遷又參議副使于廣西天啓中除名爲民崇禎初復起廣西疏辭不赴家居二十餘年殉節而死年七十有四能始美秀而文安雅有志節新建相爲座師以館選待能始能始弗往新建罷相門人故吏莫敢往視能始爲部郎追送舟次爲庀車馬糧糗言官惡之故有南評之謫光宗在東朝有挺擊之案能始有所撰述直書其顛末逆奄用事群小立三案鈎黨指能始所撰爲謗書除名爲民詔燬其鏤板當是時能始在粵西大吏爭希奄指羈留以待命知奄無意殺之而止能始具勝情愛各山水卜築匡山之下將携家往居不果家有石倉園水木佳勝賓友歛集聲伎雜進享詩酒談讌之樂近世所罕有也著述頗富如海內名勝志十二代詩選皆盛行于世嘗謂二氏有藏吾儒無藏欲修儒藏與之鼎立採擷四庫之書十有餘年而未能卒業也爲詩以清麗爲宗程孟陽苦愛其送梅子庾明月自佳色秋鐘多遠聲之句其後所至各有集自謂以年而異其佳境要不出於此

而入蜀以後判年爲一集者才力漸放應酬日煩率易冗長都無持擇并其少年面目取次失之少陵有言晚節漸于詩律細有旨哉其言之也

晦日非熊未虞茂之同用雪字

艷陽已及時晦日尚臨雪草色新未穩柳條綻仍結啼鶯闕雕窓走馬閒金埒惟有素心人相過慰愁絕

送陳德遠吏部

爲郎雖已久歸家較亦近陶潛有故居梅福亦終隱日戀北堂萱時觀東窓槿應知此別長含淚不堪攷

隴頭水

隴頭水嗚咽磨刀易出血欲斬匈奴歸不顧刀頭折男兒封侯多燕領此水照人人屢換豈惟腥臙魂不食鐵騎過之亦流汗朝水流兮暮水流漢人死盡胡人休

喜茂之至有述

之子秋爲期八月始余嫁庭鵲代人言山猿出相逐會晤猶在茲景光乃云謝波濤一何廣林柯漸多罅熟徑任苔生新亭隨鳥下露重畏蕭晨月

至惜佳夜。理詠久寂寥。聞蟬日銷化。丘壑喜獨存。簪纓悔遲罷。

高橋行

東西有湖相競白。只隔湖中一片石。石橋湖水炤人行。幽意盈盈動日夕。坐來水滿月亦多月。在兩湖誰作波波香。羨殺採蓮曲。却見長江帆影過。

丹榴行

父老傳云貴溪被難時樓前榴樹忽僵後數日仍活

君不見信州丞相第。十二高樓稱綺麗。雕甍共倚黃金堂。繡柱遙連白玉砌。瓊恩寶澤錫嘉名。睿藻宸題照日明。方圓法式頒儀部。多少金錢給水衡。複道文牕開扇扇。極目欲窮西楚甸。靈山黛色稠疊來。彭蠡湖光微渺見。山川如舊人事非。聖主原施不測威。胥江已見浮鷗去。華表空聞化雀歸。魂招歸來上不得。寂寂高樓徒歎息。火燒崇墉落劫灰。塵飛綺棟無顏色。可憐歿後見精忠。青史相傳貫白虹。欲知血淚何時滅。秋老榴花開尚紅。

題胡可復水閣

驅車來往桃葉渡。渡頭歌管喧盈路。金陵惟此行樂地。可惜爲官不得住。我官無事長日間。之子幽期坐此間。橋上行人俱在水。鏡裏嬌娥別有山。

幾行楊柳枝交蔭。門外彎環堪流枕。雲散仍從几席生。潮來半是闌干浸。月明艇子搖雙雙。兩岸人家浮玉缸。有時暗泊疎簾下。見爾科頭坐北牕。

城南古意

白浪隱簾鈎。清風聞棹謳。看人惟看影。同沈不同舟。已出東隣裏。難逢南陌頭。誰知算潮水。半作斷腸流。

永慶寺竹園看雪

搖搖林影外。雪滿夕陽前。此地無人到。來看尚宛然。翠深俱在嶺。寒極不生烟。欲問茲心境。惟應一喻禪。

宿范東生池上

白下思千里。吳門到一尋。預知片榻上。緩我故園心。良夜不復寢。清霜時在襟。除將杯酒外。直許是長吟。

臘月朔日聖果寺訪戒山上人

客裏嘉平始。山中歲序殘。樹呈群石巧。花雨一江寒。明月臨禪窟。清霜覆戒壇。應知西向笑。不是爲長安。

過沈從先

幾度過吳苑情親問所居相依昔日久但覺此時疎踪跡飄蓬外詩篇脫
草餘自知苦不足於子意何如

宿石頭菴

經秋成慘思入夜始玄言霜白先微月鐘清乍嘯猿澗流應閉葉山雨未
開門明日疎林外能禁覽眺繁

舟夜

欲作題詩別仍爲命酌留故人來不斷淹坐勝於遊樹煖微蒸雨星寒盡
入流秣陵何日到信宿未移舟

夜登石鍾山

湖口行人曠山門入樹幽鍾鳴片石夜月滿九江秋洞裏懸漁網崑前過
客舟醉歌仍未已清露濕滄洲

別喻宣仲宣仲之閩

思鄉情有極送子意無涯明月看時別清霜夢後知江空茅舍靜秋半柳
條衰九派何須問居然怨兩岐

泊舟大湘

停棹投漁火人烟自一區遠行銜月淺隔水度螢孤夕露無聲墜寒猿有
淚呼臨流歸夢促安得涉江湖

建州道中寄家

爲客無停况朝昏惜解携山容看兩郡水色別三溪遠雁衝雲外殘蟬泣
雨西征途猶未半歸信豈堪題

十六夜步月用輝字

清宵不看月誰忍負秋輝林壑欲相亂江風來甚微名香生道念落葉點
山衣池上枝枝鳥天涼同客歸

沙溪別東生

幾夜舟中語沙溪便有程忍將離別淚一洒合州城小雨入江暮微陽穿
樹明日歸何不得歲晚事孤征

歲暮送鄭知事之蜀二首

暫爾歸仍去征衣未拭塵蠶叢行候火猿峽過沾巾祿薄奴從嬾官閒吏
苦貧西風吹短髮又逐歲華新
豈不念行樂重爲王事牽夕除何店裏春到故園邊路更過三峽人須老

一年淒涼盤嶺夢。正及子規天。

詠墨紗燈

杭州元夕席上作一時罷唱

質裂橫疑水。光生薄似苔。憑將彩筆畫。認作剪刀裁。鳥向空中度。花從鏡裏開。細看若無力。不畏曉風催。

送叔度還閩

坐看諸客去。始信一官非。道固憂將喪。時猶不任譏。瘴烟歌站站。雨雪歎霏霏。那得從商綺。西山賦采薇。

再送宣仲

此時君定發。安得復蹉跎。雁信南來少。鷗群北去多。芳洲雖可涉。寒月竟誰過。餘興乘冬煖。江行踏淺莎。

遊楊氏園

苔深知石古。竹長見墻低。積翠沈波底。斜陽到岸西。搜花成小汎。摘葉任分題。何日漁樵老。能容此地栖。

柯嶼訪陳惟秦宅

馬上迎寒色。梅花歷幾村。所之俱白雪。不識是黃昏。澗水仍前路。人家盡

後園何聞棲隱處。始爲到柴門。

初十夜月

月色輕雲裏。秋聲細雨邊。經旬移節候。灑暝作涼天。鳥宿明河斷。蛩吟古塞連。予心耽寂寞。耿耿不成眠。

溫江道中

溫江離省近。民俗向稱饒。處處是流水。時時當度橋。漚麻成白雪。釀酒比紅蕉。底事歸心發。驚聞估客橈。

寄謝在杭

今年頗豐熟。古跡恣搜尋。玄室有奇字。琴臺無俗音。讀書知夜靜。采菊見秋深。粉署多清暇。應知同此心。

脩覺寺

漢時脩覺寺。唐代上皇題。蒼翠驅津筏。虛空轉石梯。江聲文井外。山色武陽西。寂寞僧房裏。曾容名士栖。

夜泊彭山江口

錦城平日暖。旅泊始知寒。犍蜀中分地。岷峨相向看。岡連三女冢。水疾二

郎灘蘆葦風吹急蕭蕭漢將壇岑彭遇害此地有彭亡之稱

雙流

萬里橋方度雙流徑已存薄寒成翠色疎雨點黃昏竹柏密他樹水雲平
過村群鳥棲欲盡纔到縣西門

寄林茂之

與君期入蜀珍重尺書回祇索詩篇寄不同朋友來益州香米熟官舍菊
花開敬却巴中路猿聲一段哀

署中對月

客邸當良夜觀空在一庭月為片水白雲作斷厓青砌合叢邊露牆過竹
裏螢北牕時偃臥風起自泠泠

森軒書懷

園日涉成趣經時胡不過雀迎防踐稻魚戲欲翻荷兒輩知余懶僧寮占
處多連宵無月色微雨濕烟蘿

桂林風謠二首

夜坐多蚊母秋成半芋魁寄桑傳釀法文石中碑材戍餉資橋稅山田仰

糞灰廣南商販到鹽厥雪盈堆

徃糧難粹辦村老未全馴風俗傳雞卜春秋祀馬人法依山例峻歌疊浪
花新嬾婦田間過忙將織作陳懶婦山猪地食人田禾以机村之物陳設則止

寄錢受之二首已卯

拂水丹房啟懸崖白羽窺知君行樂秘轉自切憂時豈即携家隱猶云拜
貺遲蒼蒼烟與霧已抗俗塵姿

聖世優閒典初非前代論不聞宮觀使但可賜歸恩客有時驚座公無日
署門語侵朝事際趣令倒芳樽

送陳民部出守思州青州人

言辭粉署重凄凄道路時聞征馬嘶日照夢懸鄉樹外夜郎吟向郡樓西
竹雞群裏登峨嶺銅鼓聲中出朗溪我欲白門拔柳送相思此夜有烏啼

金谿道中

滿天煙霧晝冥濛狐兔荒阡過幾叢漠漠白楊遮面雨蕭蕭黃葉點衣風
孤村斷火三家閉一水衝橋半渡窮門巷淒涼衰柳在不堪繫馬夕陽中

輓周先生明府四首誰始登第後走千里哭周君之墓于金谿其

魂迥難招屈左徒傷心忍顧藐諸孤龍精帶雨長鳴劍鮫淚臨風盡落珠
八口喪歸扶廣柳一官甌破見萊蕪不知寂寞高堂下尚有青蠅弔客無
長安聞訃客魂驚一夜關山挽不成夙昔但揮離別淚如何能盡死生情
風前殘燭吹南浦雪裏孤身慟北平國士厚因酌未得夷門肝膽向誰傾
泉臺寂寂夜漫漫永隔音容想像難遺囑倩人傳訣別相思託夢接悲歡
花滋憤淚河陽縣水嚇游魂黯淡灘敢問皇天容訴恨獨排闥闥五雲端
白馬驅馳楚國陰西州消息半浮沉中山篋滿皆飛語流水絃孤孰賞音
鄰笛一聲聞鴈落墓門千古聽猿吟餘生不盡酬知己寧但吳鈞挂隔林

金陵懷古四首和汪仲嘉

江東列郡領丹陽鼎足三分此一方總爲石頭成虎踞不知巫峽下龍驤
雲生寢廟千秋闕月照籬門幾夜長年少風流能顧曲行人猶自說孫郎

右吳

一從荆棘歎銅駝五馬爲龍世所歌晉室山河遺畧盡維中人物過江多
楊花寂寂新宮出燕子依依舊宅過欲向登臨感陳跡至今天闕尚嵯峨

右晉

鍾阜霜飈館已傾至今哀壑起秋聲針樓銀漢含情語画屨金蓮逐步生
日落盧龍迷古戍天寒白馬走空城不堪重理玄暉詠極目澄江似練平

右齊

齊雲宮觀景陽樓盡入隋家作蔣州下若溪寒明月夜後庭花落隔江秋
疎鐘夢斷猶疑響紅淚看餘獨不流何事高情江僕射攝山泉石恣淹留

右陳

謝公墩

謝公墩上日閒行四野霜天一倍明亭館已空雲物麗寺門相近夕鐘清
寒山又傍斜陽路江水終銷十月聲載妓如花不同賞風流應感古今情

楓亭

長亭山勢倚岩堯半壁斜陽散采樵野燒輕陰遙度水海門喧市乍歸潮
蘆花古戍生殘角木葉西風過斷橋回首不堪仙路遠馬頭塵夢又今宵

清源絕頂

重重磴道入雲登忽接空香最上層松下輕烟埋斷碣塔中殘照送歸僧
遠江蛟吹千帆雨絕壑狐餐一片冰衣帶天風吹落盡危闌蕭瑟不堪憑

八月朔日王元直招集南樓送陳汝翔之東粵王玉生之清漳沈
從先還姑蘇徐興公之建溪陳惟秦之聊城蔣之才之廣陵余返
白下

西風蕭瑟動離顏。一樹衰楊不剩攀。秋老幾人猶白社。月明無主是青山。
征途南北高樓外。客淚縱橫杯酒間。此別紛紛難聚首。天涯那許夢魂閒。

別吳子修

執手依然在路岐。勸余行役不須悲。況當白下閒官日。盡是清尊對客時。
回首故山俱惜別。出門新月便相思。片鴻不斷能來往。還爲題書寄所知。

寄題奚川八景詩爲錢受之作

予選明詩嘉靖中。鮑菴唱和石田翁。論晴較雨當家話。食葉成文道者風。
吳地疎篁堪避俗。錢王荒草滿離宮。書聲一派深更裏。遶過奚川橋子東。

黃元常徐興公見過因游西湖

兀坐齋頭對此君。閒游率爾便爲群。許多烟景隨鶯住。強半春光與客分。
久雨乍晴花盡放。易寒成暖酒微醺。墨池何處尋遺跡。大夢山前雜暮雲。
春首社集感懷

社家寥落不成歡。雖是芳春似歲殘。舊雨已將消息斷。新詩那得遞相看。
遂中踈冷梅花韵。筓裡酸辛菜甲盤。誰是伐檀有遺詠。空令惆悵在河干。

初四日携具西園候夏彙仲令君因談時事有感庚辰

新潮何日發吳航。屢聽車音到画廊。階下瑞雲重對葉。座間仙令有餘香。
借籌無計匡時短。秉燭行游覺夜長。湖海尚存交誼在。嚶鳴端不負春陽。

安蓋卿招集蔣弢仲鄭肇中徐興公諸子送春

令節那容心賞違。天涯有客喜相依。似因歲閏遲遲別。不道春光黯黯歸。
閣下鈴籤稀報漏。坐中單袷屢更衣。漫言白社凋殘甚。掩映榴花杏子肥。

林異卿客歸志感

江北山東已戰場。江南憂早復憂蝗。若歸家裏無多事。漫說閩中只小康。
別後山川俱寂寞。眼前朋舊半銷亡。相看惟有西峰叟。凍手抄書日數行。

輓徐興公壬午冬

詞場領袖失三山。所恨存亡一水間。獨抱玄真歸洞府。空餘大翮落人寰。
平安兩日無書至。慟哭千秋有夢還。老泪可如冬節澗。祇將嗚咽當潺湲。

癸亥除夕

廿年曾注粵參藩前後趨承竝主恩嶺外民生空杼軸遼陽兵氣咽關門
私憂國計無歸着屢到家書亦厭煩半百已過彈指頃尚留殘燭照黃昏
癸未上巳李子素直社城樓卽事

豫章諸郡徹胡笳閩海猶然天一涯三月風光臨上巳兩京消息隔中華
登城預想魚麗陣入幕誰爲燕子家世味不知如此惡且將清況試新茶

金陵雜詩二首

野草傍幽澗草長澗亦滿不知水流急但覺人步緩
朝出太平隄逶迤芳草齊楊花飄作絮觸面使人迷

皖口阻風二首

風入天門吹欲開馬當雖險却奔迴爰居欲避應何處猶有飛魚樹上來
風聲不定在何邊起視長隄樹影偏客恨不如風裏樹一枝吹落向南天

始本集云枝枝吹落向南天余改枝枝爲一枝林茂之日作

留別金陵

微月斜陽影已低霜風四起夕淒淒鳥生兩翼不飛去只在白門城上啼

送鄧汝高之京

問君此去欲何之江北江南各一涯南北卽從今日別銷魂不在渡江時

除夕東非熊茂之

度嶺穿林境孰如懷人遙望片雲居應知寂寞禪關裡一樹梅花共歲除

和聞梵

山下層層起暮烟山中一點佛燈然僧家功課如常事只有朝昏無歲年

荔枝嘆二首

去年荔熟初營閣今歲閣成風雨惡他處蕭條尚可言忍向閣中看荔落
十八娘家粉黛殘玉肌羅帳淚闌干楓亭三日無消息馬上空歌行路難
嬌羞十五閉房櫳風雨無端妬守宮玉鏡臺前倚惆悵郎家不送荔枝紅

俗女子將嫁男家先一年送荔枝紅

夔府竹枝詞四首

早看東南算看西蜀天只怕上頭低東邊日出純無用雲暗上頭三尺泥
君居北井妾南沱對面相看隔路多須趁漁舟過急峽還隨鳥翼上斜坡
今日峰高雲束腰平平一掌在明朝朝來出門又如儂是好言郎莫焦
沿江坎上卽田疇滿店燒春酒氣浮峩眉五月雪消水剛讓儂家割麥秋

板橋

兩岍人家傍柳條玄暉遺跡自蕭蕭曾爲一夜青山客未得無情過板橋
壬午除夕四首

半月之前已立春春光猶自隔河津漫言今夜須牢守放着年光已七旬
雒陽齊右與襄陽生事蕭條憶遠方三大名藩俱蕩盡有何家計論消亡
梅花落盡絳桃開臨老偏宜緩緩來漏洩春光無次第不須簫鼓更相催
閩海誰云易作霖霧霜三日但陰陰笑把屠蘓問童穉何渠水旱不經心

柳山人應芳

應芳字陳父海門人僑居金陵住城南之杏花村近瓦官寺舊京最僻地
也爲人和雅美鬚髯修容止衡門兩版非力不食往還惟曹能始林茂之
三四人他無所詣作詩不輕出語每行街市低頭沈吟悠悠忽忽觸人肩
面不自覺也嘗語人作一律詩必還魂數十番方得意愜其矜慎如此無
子以其壻葬有柳陳父詩四卷廣陵詩人前輩有盛名推陸無從沿染七
子流風不克自拔陳父名不及之篇什亦寡興會清發剪刻常言自可使
無從却步此論實自余發之而白下談詩者無異議焉

正月十七夜宴李太保西第

正元望後宴平津羅綺初筵入早春盤馬鬪車纔罷夜殘燈剩月尚宜人
梅花落到歌前緩柳葉開經勝裏新不信金吾仍放禁歸時看取六街塵
詠美人梅花對鏡二首

曉起一開鏡梅花影鏡傍轉鏡失花處方知不是妝
香奩妝欲罷移照梅花前徘徊兩孤影抵死鏡中憐

人日對雪

人日逢晴勝不晴雪亦嘉當由催剪綵碎却幾梅花

青溪小姑曲

小姑家住秣陵西慣聽城頭烏夜啼向爲無郎嫌出入不知門外是青溪
勞勞亭送客

勞勞亭下路東西翻遣行人到此迷山鳥似經離別過至今不敢盡情啼

古意酬劉明府

侯生七十老監門皮骨都消意氣存不是衆中虛左待當時誰報信陵恩
王光祿家屏後琵琶短歌

十二金屏逐面遮。雙鬟背倚彈琵琶。六么絃急齊聲按。桃葉桃根舊一家。
曲罷屏開但香霧。餘音空遶珊瑚樹。中年魂夢不驚飛。雒月巫雲引歸路。
長安送馬參軍之金陵
去去南遷客。遠送黃金臺。長江臘月春正來。綠冰片片迎船開。問君無事
蓮花府。一日看山定幾回。

胡可復水閣短歌

長夏宜人溪上住。短薄疎籬圍水樹。炎蒸不到蕭森處。轉壁迎山閣子開。
涼風度雨北牕來。濕花吹集木蘭臺。閣中別貯人如玉。停波靜寫脩蛾綠。
簾下凝妝看不足。画槳誰家載妓過。倚闌竊聽歡聞歌。盈盈無奈蕩舟何。
酒船歸後溪聲靜。斜月窺河升半嶺。照見雙栖梁燕影。

予適太原熊惟遠吳求叔還武昌同賦

方舟臨古渡。分路思依依。自是行人衆。非關送客稀。晉山將北向。楚水復
西歸。同作離群雁。君還一處飛。

送錢叔達遊閩不遇還吳

太行聞失路。此地亦沾裳。世變窮交畏。年還久客傷。榕城恒霧雨。梨嶺異

風霜。歸臥茗溪上。長貧是故鄉。

別車福州

孤舟將北渡。轉轉切歸心。衣積他鄉淚。葉揀故土音。山長催日暮。江暗結
秋陰。回首閩南路。思君一水深。

題陳蓋卿溪上居

晚歲家溪上。蕭然林下風。栖雲山向夕。寫月水承空。岼折長橋落。城臨小
市通。看君忘出處。將老一丘中。

秋夜感懷奉寄陳抱一先生

砧杵千家急。偏傷故國情。夜雲輕欲散。涼月皓方生。燭照愁眠影。蟲吟病
起聲。載懷今昔感。老愧鄭康成。

題魏少府破屏風

依倚忘年歲。中傷冀爾容。乍通宵案燭。不掩午堂鐘。射雀猶存影。彈蠅已
失踪。勿言新可代。官冷若爲供。

十三夜讌馬姬館

芳宴妖姬集。紛如竊月來。回身迎夜燭。連手逐春杯。緩舞盤中柳。新妝屋

裏梅停絃將送態猶畏上聲催

戲贈楊二病起

聞卿春病起閉閣懣醫王。小愈雖憐妾長顰不然郎絃疑新製曲衣識舊熏香。旦夕猶宜慎空牀夢亦防。

長千里看迎臘月春

東郊南陌動遊塵路入長千百戲新玄籥已吹開歲律青旂將引隔年春。林藏殘雪先銷柳河帶流澌欲上蘋初勝風光常勝地今朝都占看來人。

正月十五日同盛太古集雨花臺

郭外香臺勝日登天花曾現六朝僧。宜春猶載屠蘇酒不夜先觀太乙燈。柳上輕烟吹作雨梅前殘雪積成冰舊遊更向新年感草色青青似杜陵。

和陳伯孺西湖十咏二首

偶向武林遊曾于天竺住明日欲離山晴霞故變雨夜半高峰望微茫海日光下方未覺曉應是蔽扶桑。

荔子曲

白玉明肌裹絳囊中含仙露壓璠漿城南多少青絲籠競取王家十八娘。

送華將軍歸隱

南越東吳有戰功閒心無那逐冥鴻只言歸臥青山好何處青山非世中。

西湖春日戲贈潘景升

武林門外正春華十里空湖帶淺沙夾岸樓臺千佛地隔城簫鼓萬人家。青絲遊騎乘朝日紅粉回舟映晚霞莫訝劉郎歸未得六橋芳樹半桃花。

初聞倭警有感

東夷海外播風烟回首扶桑氛祲連白羽插書傳幕府黃金刻印拜樓船。朝廷欲問來王日父老曾經入寇年辛苦折衝胡少保永陵一詔至今憐。

豫章朱芾斯宗侯逸園雨中宴別屠太初之南海羅敬叔之武昌

李林宗之白下孫泰符之劔江歐陽于奇之毘陵予還廣陵

滿堂遊子歎飄蓬無數離情細雨中飛蓋西園因卜夜挂帆南浦待分風。豈知江海經年別不見關山去路同他日相思非一水尺書何處寄春鴻。

送李臨淮上公出鎮金陵

節旄南建歲將闌雪落津亭曉未乾百戰山河重作鎮三朝劔履獨登壇。營開江障鶯聲早路出邊城馬色寒天與宗臣憂不細金陵千古舊長安。

雨夜觀妓同俞羨長梅子馬陸長康賦

美人雨館夜相迎，燭下微聞笑語聲。
纖月不來眉上照，濃雲偏着髻邊行。
生憎灑砌沾羅襪，翻喜飄窓趁玉笙。
非霧非烟勞想像，無如密坐看分明。

七夕詠王美人百花画衣

七夕画衣裁一花，一色開當筵翻酒濕。
爭道渡河來

真州侯師之席上看梅花

此是還家路，如何不見家。
却從他席上，含淚看梅花。

和潁州張進士飛花曲

玉顏昨日一花開，今日飄零野水隈。
縱使春風解相惜，何因吹上故枝來。

金陵竹枝詞二首

御前隊子小梨園，長奉千秋萬歲歡。
一自武宗巡幸後，可憐跳與外人看。
舊院後門春草新，前門又聽叫官身。
盧姬已嫁徐娘老，歌舞行中有幾人。

范太學內

內字東生，烏程人。祭酒應期之弟之子也。
祭酒豪舉，跌宕與顧益卿、王承父、悲歌、忱慨爲意氣之交。失勢家居，不爲鄉里權豪所容。歿後，人爭蹈籍。

其家東生起孤生，嶽嶽不爲人下數。
困長吏盡破其家，徙居吳門鑿池種竹。
攻苦讀書，沈酣唐人之詩，諷詠其清詞麗句。
苦吟精思，寢食盡廢。引洞庭吳凝父爲同調，務盡刊甘醲肥厚，獻酬傭僱之詞。
視餘子茂如也。家貧落魄，出游八閩滇南，搜剔名勝，往往垂橐而歸。
萬曆之季，操黨議，持國論者多出茗雪間。東生好樹頰頰，與之相抵牾。一時詞客不爲東生許可者，希合貴人風旨，群噪東生。東生以此重困憤懣，不得志，輯全唐詩千餘卷，抵手塚足，迄無寧夕，咯血數升。以卒。年四十有四。
凝父手定其詩四卷，而爲之序曰：方其苦吟時，收視反聽，馳情結思，不傍古不緣今，不拘律不適耦，日斷月就，歲以琢之。迂回而涵，特窈窕而竒幻，一字未安，寸心幾嘔。自簡練以至純粹，若繡錦未組，不異恒絲及絲絢之具。針巧之飾，文章炫然。然後知爲神于法者也。自王李之派盛行，海內幾于糜爛。相去四十年，而能始起，闡非熊起新安，允兆起茗東生，凝父起吳希風，抗志在大曆元和之間。清新安雅，彬彬相命，進而之古，有其端矣。鍾譚崛起，鬼怪公行，滔滔江河流而不返。識者有深恫焉。余列諸賢之詩，都爲一集，使後之觀者有百年世事之悲，不獨論詩而已也。

送顧生仲默

日日好携手，我閒君亦閒。侵晨出郭門，月落猶未還。云胡輒改途，不令車塵間。

送丁長孺禮部

夙昔忤時宰，初衣投故園。孤立逾一紀，不求他人援。仕路日清夷，除書下丘樊。時維冬春交，整此北上轅。臨行將何贈，憤激成片言。天潢無別派，滄亂由楚藩。九重聽彌高，物議徒喧喧。厥事君所司，竦身爲平反。

洗妝樓歌

結樓黃山曲，不礙黃山雲。山雲吹作雨，漠漠復紛紛。紛紛漠漠春何有，洗出梨花隔垂柳。花開花落郎未歸，樓上美人相憶否。

送張孟孺

明時尚文不尚武，屈膝低眉誰比數。祖宗汗馬無乃勞，今日橫金視猶土。將軍素多林下風，操觚羞與荷戟同。名高翻遣身難避，幕府喧傳辟書至。欲甘小草多苦辛，白雲堪臥其如貧。生憎朋舊問出處，此意悠悠難告人。舟次平望懷王子幻。

微茫烟水闊，不辨故人家。湖上晚風急，滿天吹雪花。春帆移遠樹，夕鳥啄平沙。獨酌誰爲慰，隣舟鼓自撾。

訪趙凡夫廬居

無路覓君去，亂峰雲若屯。嵌空巢樹杪，鑿石沼山根。古帖從兒榻，新詩與婦論。閒門隣拱木，蒼翠自朝昏。

遣悶

空外響清砧，秋風日以深。已知貧次骨，轉覺病關心。薙草疏新逕，扶藤上故林。自吁還自哂，昨日散千金。

清涼菴贈僧

芒鞋定遠近，天路臨蒼蒼。結字久未了，種松新已長。平池託空影，斷壁飛斜光。欲問吾師法，吾師法已忘。

雨中訪吳允兆

寂寂故鄉路，心知尚有人。那知今是客，猶憶昔時隣。樹暝烟催夕，花寒雨殢春。青山獨無恙，宛對別來身。

東鄧遠游

日日何所得。榜人應見猜。油然碧草外。獨上姑蘇臺。西子邈已去。東風空自來。茸桃李樹爲問。幾枝開。

栗川夜泊懷孫齊之

野宿次鳧鷺。青青荻笋齊。潮痕隨月落。山勢壓城低。殘夢風前拆。歸心曙後鷄。還知高隱處。只隔水東西。

霽

肅肅池上雨。雨收池更寒。從來通醉理。自此豁幽端。蟬螻飲方歇。鷓鴣鳴欲闌。寒裳轉溪路。晴瀑少人看。

寄荅鄧明府

黃池路遠近。此別遂茫然。顏色既不接。音書空復傳。省耕春草外。退食晚花前。聞道無留事。閒情異往年。

臨安

舍筏愁將夕。墟烟極望平。餘花紅半委。初筍綠叢生。水漫魚登市。山昏鳥入城。心心天目路。祇解向西行。

夜泊虎丘同劉元聲伯仲

翳然一片雨。遠沐春山青。舉棹興方屬。引觴歌莫停。林鐘去杳杳。川火來熒熒。坐待月輪出。僧寮猶未扃。

過武陵懷龍觀察

去指黔鄉近。回瞻楚甸遙。郡門臨白浪。驛路疊青霄。積雨寒初霽。長烟濕未消。征鞍停不可。無賴是今朝。

平溪

停驂古城曲。薄暮往來稀。瀨響生官舍。崖寒中客衣。葉彫花簇簇。雷迸雪霏霏。欲寄鄉園信。黔南斷雁飛。

貴筑憩越孝廉別業

結宇數峰間。泓渟一水灣。谷風過午冷。原樹入秋閒。苔動頰鱗戲。花搖翠羽還。誰知于役者。彌日此開顏。

訪葛震父

村村鷗鷺群。寺寺斜曛渡。口獨來客岩。中重訪君鼓。聲魚市接帆。影稻畦分看。取前楹竹。新枝礙白雲。

望茅山殘雪

華陽望不極，縷縷晴煙生。斜日半山雪，照人巾烏清。漸融仍合沓，近晦逾空明。強載筇輿去，搖搖人外情。

貽董六退周

春來春去總無端，別院沉沉獨倚欄。風抑疎花仍怯晚，雨撩纖柳不勝寒。離情泣向絨中訴，怨色偷從鏡裏看。咫尺巫陽峰十二，片雲還往若爲難。

登縹緲峰

天近筇輿如踏空，翩翩巾烏泠泠風。遠尋亂嶂出帆外，近數諸村懸鏡中。沙草微茫似楚澤，澗花淒冷非吳宮。湖西湖東盡堪望，兩地鄉心誰與同。

響屨廊

越艷迹如婦，年年燒痕綠。婦僧踏嶺雲，枯葉聲相觸。

贈楊孝父

清時有隱者，自汲還自耘。翳然茅屋上，一片堯時雲。

遊弁山

一峰際蒼蒼，遐矚了無礙。湖色上人顏，崖陰落鳥背。

送彥平游嶺南

九月羅浮道，無衣亦不寒。奇峰三十二，直作夏雲看。

曉發

春水動微茫，帆前卽異鄉。雞聲殘月墮，人語隔寒塘。

平越道中

晴時十二三，雨時十七八。山鳥何預人，連聲泥滑滑。

秣陵送李茂才

一雨綠千里，楚山如近人。留君君掉首，何處秣陵春。

傷德生兄

昔時君好飲，卮酒不停持。今日墳前土，徒然酹一卮。

哭費元朗

書隨訃音至，半信半相猜。莫謂無期別，猶知有夢來。

絕筆

愁來遣不可，流目今成昔。向夕空館寒，柝欄風撼撼。

南唐宮詞四首

桃李花開點御溝，翠華經月不曾游。內庭鴟吻移鴟尾，莫問君王十四州。

女冠烏爪解方音。識得蓬瀛路。淺深戲擲雪花鎔。紫磨漢宮誰數。辟寒金半檐。日影澆。思纔是深宮。夢覺時。敕取燒槽彈法曲。聲聲訴恨來遲。苑門深閉。柳千條。銀箭聽殘。夜寂寥。剗襪下階。羞見影。不知斜月弄芭蕉。

王蜀宮詞二首

匝匝渠穿宛轉橋。綺樓香煖月迢迢。海南蜃市渾無異。添得歌聲墮九霄。玉臉勻朱卸翠冠。宣華池上遶闌干。醉妝邀取君王顧。任東風料峭寒。

孟蜀宮詞二首

池西別殿署凌波。楊柳風微月漸多。珠箔捲來秋似水。填詞惟教艷娘歌。猩紅梳子藝成林。複砌勾欄日映深。隔院似聞催羯鼓。先開一朵是同心。

南漢宮詞二首

珊瑚裁輦玉裝車。夕醉明蟾曉醉花。南海南邊天漫漫。君臣無夢到中華。金猊香裊日靡靡。玉陛連朝奏事稀。馴獸近前親射殺。血花吹污侍臣衣。

閩宮詞二首

露華如水蘸宮牆。紅豈花兼荔子香。多少蛾眉閒待月。九龍帳底貯婦郎。四條絃上按新聲。半是先皇手教成。舊事內人誰敢洩。春來燕子不呼名。

吳越宮詞二首

春柳遙遙綠漸濃。秋花間色種芙蓉。苑中別有西湖水。一縷雲隨不睡龍。千門斜月四窓星。山近簾衣分外青。侍女夜間眠不穩。御床圓枕綴金鈴。

板橋曲

板橋斷後無復春。蒲荒柳秃波粼粼。依稀一片昔時月。來照鴛鴦不照人。

滇中詞三首

秀海海邊葭荻秋。滇池池上雲悠悠。人心恰似此中水。一道南流一北流。鴛鴦浦綠水如苔。鏡裏人家向背開。五月爨僮劉雪去。三冬爨女擔花來。迤西之西天一涯。四時長有三春花。青帘颭處客沽酒。五歲女郎能數肥。

送一公還天界寺

江流汨汨樹層層。短笠空瓢去秣陵。依舊青山風雪裏。華門深掩一龕燈。

寄吳凝甫兼簡訥公

天遠湖南漁火稀。隔林鐘磬度微微。不知此夕幽人興。月出僧房婦未歸。

荆溪

亂水聲中繫艇斜。月寒沽酒扣誰家。仙源咫尺不知處。紅葉吹來如落花。

松陵舟中遲錢受之太史

幾家閒夜停機杼支枕篷窗風許許吹盡蘋香不見人繞塘寒月鷓鴣語
柳上嘲吳疑父

送僧

采香涇上黃鳥啼藤梢掠雲筍迸泥來時卽是去時路師向此中應不迷
暮春間居和蓋卿姪

寄邵隱之

舍南舍北雨聲催欸欸閒鷗逐隊來欲買魚蝦喚江艇棟花臨水草門開
與君握手未經時一水空懸別後思心事茫茫誰共語自持椒酒酌要離
送茅薦卿水部使還留都

春日訊吳允兆

遠樹微波黯不分闔閭城畔寄孤雲春來儘有還鄉夢除却青山便是君
夜泊梁溪

泊燕子磯

檣上烏啼月滿灘月和殘雪耐人看半爐爇盡沉香火消受簷窻一夜寒
山影沉沉日乍紅峭帆人怯剪江風鷗鳧占我曾題石一半崕呀疊浪中
寄阮堅之司理二首

仲冬

訟庭寂寂散春烟碧海丹山在目前市得鯪姑堪佐酒摘來荔子不論錢
別時江草冷蕭蕭再見春光上柳條萬一故人生遠夢也應先過伯通橋
仲冬之交氣不齊桃花李花開滿溪行人認是二三月祇少黃鸝枝上啼
峴山晚歸

贈王曰常

近嶂遠空同蔚藍画船不繫酒微酣疎疎燈影出烟際隱隱人聲在水南
一月留君興未闌酒杯無限費春寒海棠欲卸辛夷盡取次看花到牡丹
西家

遇俞獻父

蛾眉不掃髻雲斜含怨含情未破瓜背倚曲欄花一樹春光多少屬西家

與汝垂髫共里閭別來不省六年餘情知一見又成別猶勝逢人數寄書

送僧入廬山

霜天一袖影蕭蕭別路無多覺路遙他日有人來入社不妨行過虎谿橋

代茅止生悼亡姬三首

深閣鳥鳴人到稀柳風吹綠上簾衣香魂化作絲霞縷時繞華陽洞口飛
獨夜寒侵半臂綾瑣窓花影隔層層依稀夢裏還尋夢繞到錢塘又秣陵
鶯雛出殼月將四燕子營巢春已三看取西陵埋玉處不生松柏長宜男

遲吳疑父不至

故人宛何在坐永芳時別別時櫻桃花離離子堪擷顏雲忽成峰喧禽將
反舌觸緒悵多違絲縻焉可絕

重送成不磷游登封

入門復出門平疇綠如砥春風吹柳花隨君日千里望望緱山雲心輕別
妻子

吳居士鼎芳

鼎芳字疑父吳人世居西洞庭爲詩蕭閒簡遠有出塵之致與范東生刻

意宗唐刊落凡近有披襟倡和集行世一時肥皮厚肉取青妃白之倫望
之人人自遠也嘗與東生及予游茗溪泛碧浪湖入夾山澆往返二十日
風清月白苦吟清嘯僅得七言絕句一首其矜重自愛如此後雜染從釋
氏法爲高僧以終詩別錄閨集中疑父與葛震甫稱詩于兩洞庭皆能祓
除俗調自豎眉目震甫晚自信不篤頗折入於鍾譚而疑父亭亭落落迥
然塵垢之外震甫自負才大以爲入佛入魔無所不可竟不免墮修羅藕
絲中疑父修聲聞辟支果雖復根器小劣後五百年終不落野狐外道也

竹枝詞四首

青山是處鎖蛾眉日日湖邊有別離却怪烟波三萬頃扁舟只許載西施
江南一雪苦非常湖上空餘橘柚鄉萬樹千頭零落盡于今那得洞庭霜
湖船來往慣風波尾後黃旗飛虎圖一夜王程三百里枇杷明日進留都
南濠有客寄書還夫婿黃柑已趁錢幾日不來湖上棹休教重上贛州船

虞美人

營門颯颯驚風雨一片楚歌中夜起拔山力盡霸業空八千子弟淮河水
腰間寶劍無精光神龍變作魑魅語美人宛轉其奈何啼痕盡染征袍紫

請從劍下化香魂。花枝肯傍秋風主。妾心不作青山雲。妾身甘作青山土。君玉若肯報妾身。重向江東整師旅。

閨中曲

客歸青海頭。報道單于死。曉起望征人。新妝從此理。

怨詩

華屋春將盡。紗窓日易昏。不知多少恨。相見與君言。

柳枝詞

綠陰如雨萬條斜。啼罷朝鶯又晚鴉。盡日春風無別意。只吹花點過西家。

春游曲

雨餘芳艸綠新齊。亭樹無人繡幙低。忽漫好風傳笑語。流鶯飛過杏花西。

青谿小姑曲

十五盈盈學解愁。珠簾不捲倚箜篌。多情明月無情水。夜夜青溪映酒樓。

雙燕離

雙燕飛。雙飛不隻棲。銜春歸柳巷。弄水出花溪。驚風起。雙燕離。一雄復一雌。一東復一西。含啼悲宛轉。顧影復差池。青天一萬里。遙繫長相思。宕峩

柱嶺不可度。雲駟日莫迷。烟霧秋去春來如。可逢寧辭萬水千山路。

三婦艷

大婦理膏沐。中婦啟房櫳。小婦獨無事。但問落花風。丈人且安臥。東窗日未紅。

廢墓歎

廢墓叢荆榛。下有妖狐穴。哀魂泣杜鵑。化作楓林血。顏波聲斷夕陽空。傷心莫向英雄說。恩亦不堪酬。讎亦不堪雪。神仙寂滅天地古。世故茫茫幾銷歇。吳王臺上望胥江。依然冷浸清秋月。

唐嘉會妻

鳳皇失其侶。三年獨彷徨。豈無雲中鶴。矯矯非所當。所居谷水西。乃在澗水陽。楊氏有好女。小字曰雲芳。年甫十一歲。許聘唐家郎。庭前植嘉樹。庭後植垂楊。辛夷爲屋柱。玳瑁爲屋梁。木蘭爲橫楠。文桂爲直闌。堂上珊瑚枝。室中五木香。朝日照清池。游戲雙鴛鴦。鶴鳴南北牖。花發東西廂。頭上何所飾。鬱金爲鳳凰。腰間何所佩。鳴玉雙琅玕。上體紫羅襦。下體紺綺裳。手中著約指。耳後垂明珠。輕盈展素足。秀色脩娥揚。言辭若蘭蕙。動靜隨

安詳年年藏閨中隣里不一見少小遵姆訓十三能織絹十五理中厨十七通經傳十九議婚約婉變人所羨天道信倚伏人事不可限吉日在須臾女婿忽染患儼儼幾何時一夕朝露變所聞朝露變慟絕不復甦舉家盡惶怖事至奈如何冷水洒其面心臆生微溫久久魂歸來氣結聊復言寔乃妾不幸慶門罹禍端願畢所從志爾輩毋煩喧脫我紫羅襦縹緗不復顧鳳凰鬱金釵琅玕鳴玉佩紛紛非所有寂寂委諸地明璫與約指此類永相棄矢志同皦日終天有如此膏沐不再施被服但縞素青絲紅綠絲兼箱付女弟父母心則善內戚生異議塊焉居歲餘媒氏來相聞村南有貴宅美好令郎君雲從多僕御具足稱田園郎君年二十讀書飽經文門戶實相當便可結婚姻雲芳聽此語掩面生號泣無端貝萋錦無故蠅止棘我心磨不磷我心卷匪席但得從容死何乃相逼迫從此絕勺水六日不一入阿母見憐女哽咽慰相及彼徒曉曉耳幸毋傷弱質吾已峻拒之還可就飲食願畢爾所志勿爲久邑邑于中事不成腹言誤彼宅此女如花好此女如玉立知書服大義意向多卓識爲服盡三年庶可成家室煢煢三年來兀兀如一日媒氏復登門良吉當及時爲合二姓好殷勤求

結禱諸姑與伯姊宛轉勸言辭門戶有如此胡乃大迷離先許得書生後許得富兒榮悴若霄壤安用多狐疑可惜桃李年春風徒自持可惜合歡帳寂寞守空閨前路一何邁爲事當三思今當就歡慶往事休煩悲飲泣答諸姑禮義全不知古道日已遠末俗日已隳婦人從一終金石亮不渝乞親五畝田佐以流黃機布帛聊禦寒粗糲聊支飢長齋事空王永得相皈依衆人徒囂囂安知心所私穢污及吾耳卽與世間辭九原如有會拚此一賤軀握拳爪透肉嚼齒血流頤珠隕澤不滅蘭死香不衰本爲奇一世反爲世所哀是時十九日月令在孟冬婚家執前約再遣媒相通血色紅錦箋一一共銀封綵盒多喜氣玉茗生春風旋行納采禮乃在季月中雲芳忽心動耳目如有營案上見彼物問自來何從衆中無以對亮得知此衷名箋裂萬縷擗地捶心胸天地非不廣一身胡不容孤魂去杳杳我命旦夕終悲風起西北白日何冥濛林鳥聲啞啞山鬼啼墻東倏忽過七日已是良辰期上堂拜父母女魂有所歸女魂有所歸父母願勿思夜來有所夢吾祖髣髴俱在世知不久將欲遊冥冥生小養嬌癡不知父母恩旦夕領清誨何以報寸心傷念垂暮景永別誰相存回言囑幼弟甚勿墮

家聲高堂逼西日定省慎晨昏出外就師訓詩書須討論阿妹已長大女
紅當自勤向人作威儀和顏來六親生別豈不苦死別不復生父母與弟
妹慰言各慇懃志意但由汝安用懷此心壻墓亦不遠相去廿里程奈爾
纖纖步不堪道上行此實區區懷第恐不容情願得死一處猶勝存一身
左右聞此語戚戚皆涕零明旦啟房櫳綺窗自梳洗飲則還舉杯食則還
舉筯楚楚美容儀盈盈好舉止哭泣不復爲向人作言語一家内外人無
不生歡喜今日心已回固知近好事晻晻日西下沉沉結昏霧承顏莫食
畢華燈閣中啟獨自鏡臺前晚妝還爲理急使侍兒寢並不由汝意縞衣
穿上身素裳備下體頭上著荆釵足下具麻履可憐金跳脫可惜金約指
一一留篋中物物不隨已素琴徒自張明鏡亦爲翳四顧無人聲空隙來
陰吹肌粟凜生寒不知此何際仰瞻帷之外復在牀之裏我死甘如飴今
宵得其所白帨絞作繩正梁堪作繫引頸入繩中夜半悠悠逝忽然聞噉
聲闔家盡驚起顛仆奔老母倉卒呼侍婢秉燭上閣中慌忽不得視競力
向後床魂魄已飛揚一時扶掖下五體如冰僵顏面卽如是不黑不萎黃
安然得所歸貞志諒已償唐家因卜地乃是澱湖涯靈輻向曉發前路行

遲遲道傍千萬人擁看生嗟咨流水爲嗚咽去馬爲酸悲兩棺合一塚所
葬亦所宜風聞下旌詔光彩生鄉閭煌煌樹綽楔巍巍建靈祠青山爲環
抱綠樹爲連枝上有芙蓉花並蒂開奇姿下有鴛鴦鳥交頸聲和諧寄語
後來者愛惜當自知湖水有時竭茲塚毋壞之

靈峰山房夜起

寥寥青蓮宇出步夜方永蟬鳴四山秋鹿飲一潭靜圓月當碧空孤塔立
無影花落樹猶香竹深澗亦冷烟光散如水平明星上高嶺

齋雨

細雨散清曉坐深移午時開簾東風入香動梅花枝獨酌亦成醉不然無
所爲

苔松上人過訪不值

孤踪石上雲飄忽本無住門外卽青山一瓢向何處離心寄春草柔艷欲
飛去引領生白烟花落祇陀樹

寒食江上

春波綠澗澗江南去江北風生浦口花蒲帆緩無力燕子乍歸來遊絲惱

寒食寒食客思家殘陽吊容色。

柳浪溪

山青秋雨後人坐秋風裏平沙下鷗鷺款款動蘆葦夜半明月光漁舟弄空水。

釣魚灣

家住此灣中不出此灣裏長日坐魚磯閒心澹無已白雲起前山悠悠亦來此搔首對斜陽綸竿久不理。

歸湖上

西風吹箬笠無恙舊江天白鳥飛破水青山移近船晚晴楓葉外秋冷荻花邊泊處堪遙指柴門生野烟。

虎山菴荅蔣十

偶坐已夕照徘徊夜復深西岑見新月墮露聞松林覺有幽人來隔窓動微吟。

嚴明甫園中

爲園剛一畝生事已云足日午聞雞聲炊烟起茆屋石色秀可食林香暖

盈掬相見無寒暄惟言酒新漉。

飯石峰晚步

白鳥不飛處雲光和水疑自吟松下路遙見寺中燈夕爽山無雨春寒澗有冰隔花相問訊月照荷鋤僧。

前溪

野風迎白衲隨步已前溪落日在流水遠山青不齊花寒聊自譚鳥倦偶然啼何處茶烟起漁舟繫竹西。

松下

松根酒一瓶月下人兩箇月落酒瓶空自枕松根臥。

宿江上

山色下空江江光動舴艫霜楓紅不盡已入暮秋景來雁忽有聲歸雲漸無影醉臥蘆中花月高夢魂冷。

秋懷

掩上聞擣衣月白秋繞屋東家紅淚妾淒淒滅餘燭閒階墮橡栗野鼠走款款風吹斷夢來竟夕不能續衰髮伴寒蛩霜花寫心曲。

泊北固山下

夕陽江色遠，艤棹潮初退。獨客吟清秋，沙鷗冷相對。水氣上城根，風聲隱巖背。漁舟載烟火，撐入菰菱內。

寺夜

林杪動蕭檝，橡葉走層際。柴門夜忘關，山風自開閉。邑邑如有懷，遙遙轉無寐。佛燈清可依，城柝冷相遞。斜月苦近床，嚴霜白滿地。

月夜懷東生

雲光吹作水，半在湖中央。遙看胥母樹，葉脫山蒼蒼。美人但高臥，不知今夜長。

天台山中

白雲伴衾宿，開戶雲飛去。出戶尋白雲，蒼厓濕芒屨。峯頭異域僧，洞口先朝樹。流水帶餘花，從來不知處。

送梁公

一瓶兼一鉢，離思自然輕。野水迎風渡，空山帶雨行。荒村過晚食，破衲任殘更。莫以前途遠，經年住化城。

度嶺

林僧言別去，自憩松下石。紅泉界空翠，巢居叫霜笛。夕光淡西水，千頃成一碧。冷信雁傳來，秋容楓點出。閒雲滿懷袖，邀我過山脊。

過高峰菴

林迴覺路枉，路枉亦自適。光風不作寒，吹烟半晴濕。澗春多異芳，嶺月少行跡。犬吠空山雲，山僧杖藜出。

采香涇

柔風吹斷蘼蕪死，歲歲春芳付流水。西岩尤剩昔時雲，斜陽照出行宮址。香魂去不還，野鳥愁空山。輕羅綉作苔花斑，苔花斑空山冷。夜深露泣西施井。

雨後登虎峰送張七

山雨飛纔歇，山雲散已齊。林香清一寺，草綠過重溪。氣暖梅初熟，紅殘鳥不啼。夕陽催客去，湖口挂帆低。

寄趙凡夫

十里寒山路，香風正采茶。偶隨樵客去，一到隱君家。細語生清月，閒心託

片霞別來湖水闊秋色上蘋花

飛樓曲戲東茅止生

飛樓宛轉芙蓉簇對列鴛鴦三十六東風著意渡江來染出蛾眉春水綠
樓頭何處得春先非霧非烟俱可憐紅芳雜沓錦茵軟塵香不上雙行纏
嬋娟花月曾無價只向嫦娥乞長夜夜長夜短那得分鬱金自繞珊瑚雲
青絲玉壺正傾倒楊柳烏啼白門曉

清明日汎舟

似晴欲雨養花天湖中冉冉生白烟波光夾岸綠無際買得扁舟春可憐
可憐最是清明節青青踏處盈盈襪陌上斬歌桑渡頭仍弄楫燕燕正飛
來鶯鶯啼未歇幾樹啼鶯歇更啼幾家芳草綠初齊橋迴野渡還官渡路
接山溪又水溪山邊水邊春風起松花柳花飛不已春風搖蕩棹歌前花
香撩亂篷窓底棹擊空明濺酒衣中流容與澹忘歸西林落日東林暝隔
水漁燈映遠扉

汎石湖同篠園居士

放棹秋光遠殘陽湖水西樹團漁戶小山截寺門低野渡一僧立汀花數

鳥啼且沽橋外酒同宿越來溪

尋王德操不遇

生公臺畔石秋月漸盈盈買棹獨乘興尋君不入城橋邊殘日下巷口孤
烟生爲說西湖去行裝似水清

寺夜看瓶菊

分取東籬色磁瓶晚更宜喬生携伎處艷冷著燈時夜久僧還對秋深蝶
不知若教歡賞地風露正凄其

寄陸明生

爲別每愁予予歸只寺居坪香風獵草坂綠雨粘蔬未足一春夢常無百
里書夕陽臨水久烟渚下春鋤

沈端伯陸仲飛携酒過碧雲菴

秋色前山好雙扉盡日開臥雲禪侶寂曳竹酒人來空響生黃葉清陰覆
碧苔城中同是月不及此遲回

西湖夜汎

疎雨洗空翠來看湖上山斷橋芳柳外小艇白鷗閒月在美人遠春忙流

水閒西陵猶喚酒燈影出花關

汎西湖同清照彥叔觀公

新語報黃鸝捎花坐柳枝山晴意自好湖晚醉相宜風起水香處月來烟滅時同舟貪夜寂移傍白公堤

夜到漁家

漁家近秋水水上槿扉開地寂月初到溪寒潮不來村沽惟白杜野坐只青苔爲說芙蓉好明朝未可回

金閨夜別費元朗

交從他處定路自故鄉分有夢難成夜無言可贈君一燈殘細雨孤橈向寒雲未曉林中葉蕭蕭已厭聞

雪中過彌勒寺

雪中尋寺遠先得一僧逢無數梅花裏亭亭出古松濕烟穿破壁野水寂寒春不待前山去風林報晚鐘

暮投上方寺

暝色投荒寺行盤翠幾層磴花分積雪橋月逝流水一宿同僧被孤吟借

佛燈曉看山下路濕氣滿霜藤

西湖曉起

殘鐘湖上月杳杳落層岑曉色散爲水秋聲聚作林閒來曾不慣幽處每相尋叢桂南山下晴香一逕深

和靖祠前晚坐

山翠出林杪祠前芳杜洲孤烟生後暝雙鳥去邊秋燈影參差水歌聲遠近舟梅花無復主曾有暗香浮

同遠士夜坐蘇堤

爐熏兼茗椀清夜只夫君漁艇出無緒僧鐘遞不分次花臨水月先鳥近巖雲坐冷忘歸去荷衣半蘚文

小院

小院曾行處今來不忍行是花皆黯淡有月未分明轉覺非前事終憐負此生遙波春一片流恨復流情

懷東生臥病

引領限湖水別離常有餘始知三月病那得一行書已落床頭葉空懷池

上居扁舟相見日。雙鬢欲何如。

雨渡橫涇懷孫惟化

東風作冷石湖船。節屆清明倍可憐。一日客程偏遇雨。幾家茅屋不生烟。野田水綠迷楊柳。古廟花深出杜鵑。寂寞橫塘人去後。吳姬歌舞自年年。

輓黃伯傳

清霜恣入百花洲。衰草殘陽送白頭。只尺有家歸不得。一杯無土葬何由。飄零舊酒南湖月。檢點來書下驛秋。多謝春風江國燕。相逢猶是話窮愁。

古意貽董六退周

逶迤香閣繞離魂。新舊羅巾總淚痕。拔後菴菴心不死。折來楊柳眼空存。青苔夜雨淹拋枕。黃鳥春風伴掩門。五十絃中渾是怨。腰肢禁得幾朝昏。

柳陳父墓

古道盤迴向遠空。荒墳悽楚帶長林。浮雲已斷還家夢。衰草空餘住世心。海色隔城邀暮晷。江聲挾雨送秋陰。青蓮後事何堪問。幾處騷壇淚滿襟。

寒食日登莫釐峯望縹緲峰弔陸纂甫

林中當百五。屐齒汎晴光。綴暎榆錢小。縈春蕙帶香。兩峰看迤邐。片水悵微茫。節屆魂俱冷。時移夢轉長。土應平傲骨。泉已澀吟腸。有子荒新塚。無烟禁一鄉。雨花滋舊蘚。風葉沸新楊。淚盡鶯啼處。寒裳去夕陽。

秋夜同朱十四懷令弟十六

秋色帶檐楹。空山薜荔情。爲歡翻憶別。因弟轉憐兄。雨葉晴猶濕。霜階水共明。經年書一紙。曾到石頭城。

聞簫聲

洞簫如縷到尊前。明月高樓夜可憐。何處一聲悽易斷。千家花柳障晴烟。

破山寺

巉岼隨石轉。迤邐踏花行。古壁龍蛇氣。空岩風雨聲。佛香清渡水。鳥路白過城。絕頂遙觀海。蒼茫曉霧生。

寄李本寧

南楚文章伯。西秦斧鉞臣。名香堪殉死。宦拙祇留貧。酒態生長夜。花情送早春。芙蓉空自采。烟月隔江津。

哭吳健父

寒日沉沉下遠邨。空堂寂寂閉黃昏。文章命薄誰知己。山水情多卽故園。

一壑荒烟收病骨。三更冷雨送愁魂。傷心莫問玉孫草。幾日春風綠燒痕。
林屋山石上遲謝去非不至。
曾記林中別。相期石上遊。亂山空欲算。殘葉已無秋。岸白雲初斷。江空月
自流行踪。烟水闊。何處問沙鷗。

秋日聞蟬

蟬聲嗚咽處。時序變衰中。玉鏡妝初冷。冰絃調已空。亂山淒夕照。踈柳怨
西風。獨有悲秋客。相憐寂寞同。

王二丈輓詞伯穀

驚雷百里聲摩空。江南日夕奔蛟龍。濕雲墮地水波立。兩山不辨青芙蓉。
金閶城頭夜吹笛。金閶城下王孫泣。笛聲寥亮悽欲斷。反恨當年一相識。
何人彩筆能生花。何人赤手握靈蛇。金罍美酒浮琥珀。與誰同醉黃公家。
有酒須澆墓上土。有劍須挂墳前樹。世情反覆那得知。柳花一夜飛新主。
哀歌不盡薤露篇。離絃轉託箏篔語。生平只合狹斜行。紛紛安用栽桃李。
鄧尉山空日暮時。招魂惟有古松枝。分明咫尺眼中路。及至出門忘所之。
宿虎跑寺

濕烟鬱結亂山橫。敲斷鐘聲火自明。野寺冰霜經晚歲。石林風雨坐殘更。
十年一夢浮雲冷。四海孤身落葉輕。願得皈依清淨海。蓮花香裏證無生。
人日雨中上方寺看梅

人日初開社。香風拂寺門。梅花殊耐雨。一白自成村。濕氣蒸初艷。春聲散
冷魂。鐘殘僧出定。留語坐黃昏。

無題

綺疏微透曉光寒。欲貼鴉黃展鏡鸞。錯怪桃花似儂面。一番風雨便春殘。
壬子元日

流光去無著。倏焉歲云除。東風動猷猷。朝日生蓬廬。葉書委空壁。菽麥食
無餘。卽事已如此。前路復何如。

寄情

殘山如黛。月痕斜。子夜青鞵踏淺沙。十里紅橋東畔路。梅花多處是君家。
梅下送客

花間啼鳥喚遊頻。花下離歌動早春。斷送香魂征袖雪。飄殘素艷馬蹄塵。
踈枝帶月牽幽夢。長蘂含烟悵別神。明日重過今日地。爲憐歧路獨醒人。

燈下

野寺十年心。無言坐燈下。夜半風雨來。蕭蕭打破瓦。

蕉雪空庭下送鄒舜五

幾點蕭疎雨。新陰閉戶生。美人來冉冉。相闔綠盈盈。似雪山空冷。無風水簾清。離魂淒入夜。葉葉起秋聲。

夜宿三山寺望茗上懷吳允兆

只此堪乘興。秋風一放船。天清皆在水。樹冷不生烟。靜後轉忘寐。望窮殊可憐。書來同所願。池內有青蓮。

月夜

昨夜因看月。清光動旅思。今宵宜早睡。莫待月明時。

寄懷王元直

月照蘋花冷。秦淮蕩酒船。還家同一日。為別易三年。海樹含青雨。江鴻帶白煙。西風又飄泊。衰草自生憐。

紀興

道人贏得半生閒。枕上清泉座上山。猶有半生閒不得。婆羅影裏扣禪關。

柴門

柴門涼氣入。風動白綸巾。秋色孤雲外。斜光映水濱。貧惟甘薄命。病亦任閒身。累月尊中禁。還來載酒人。

虎丘僧房尋郭聖僕乘月登山

長堤沿短棹。轉入翠微灣。酒伴秋相集。僧房夜不關。布袍先受月。竹杖早過山。何處歌聲起。悠悠林木間。

空坐

空坐原寂寂。落葉更蕭蕭。片月閒相照。牀頭挂一瓢。

沈布衣野

野字從先吳人。為人孤癖寡合。不能治生。僦廡吳市。傍教授里中。下簾賣藥。雖甚飢寒。人不可得而衣食之也。曹能始見其詩。激賞之。延致石倉園。題其所居之室曰吳客軒。好飲。每夜半大呼索酒。矜重其詩。徘徊吟賞。自能始徐興公兄弟外。不輕示一人。能始常嘲之曰。半夜號咷常索酒。一生粗穩自圈詩。亦可想其風致也。有臥雪閉戶。燃枝榕城諸集。王伯穀徐惟和及能始為叙。

子夜歌

門有車馬客。姊妹易衣裳。儂有好顏色。那在紅粉粧。

寄書曲

行人促家信。把筆倚前軒。書札經姑手。閒情不敢言。

采蓮曲

解道芙蓉勝妾容。故來江上采芙蓉。檀郎何事偏無賴。不看芙蓉却看儂。

懷王澄伯臥病

落紅寒食漸紛紛。強自携尊對夕曛。春到馬卿偏臥病。徑開羊仲正離群。林風幾處邀歌扇。花雨千家撲舞裙。何事與君俱伏枕。鶯聲喚友不堪聞。

春日小齋

社日方過花正肥。閑庭亦自長苔衣。柴扉暫啟元無事。恐有梁間燕子歸。汪長文張成叔北上便道見訪

烏皮几淨映莓苔。臥病柴扉晝不開。庭樹葉齊花盡落。屋梁塵動燕初回。黃金散後青山在。三徑荒時二仲來。借問一尊留茂苑。何如竝馬向燕臺。

邊詞

塞上風高獵馬稀。天山六月雪花飛。聞人不解征人苦。直到隆冬始寄衣。

秋日田家

爲愛田家樂。看禾到野頻。不閑人共棄。自覺此堪親。暮雨溪魚長。秋風樹果新。主人村釀好。長嘯倒綸巾。

寄陳履吉

故人閩海結茅堂。海上相思更渺茫。地氣未春先見草。山風迎臘不飛霜。林深採藥窺猿嘯。田熟開書覺稻香。我欲移家同避世。可能白髮老滄浪。

斜塘招星甫

新芋肥雞菊正黃。君來定擬醉千觴。田家村巷都相似。須識門前兩綠楊。

冬日田家

臘月江村霜雪凝。蓬蒿零落繞垂藤。床頭濁酒迎寒盡。屋後高丘候日登。古岸人喧看野燒。小橋船發打河冰。少年結束將何事。共向東臯賭放鷹。

寒食

驚心芳草上河橋。雨後推窓見柳條。厨下從來煙火少。不知寒食是今朝。

短歌行

推絃拂柱歌我浩曲。浩曲未歌。腸中躑躅。青青前溪。可鑑光儀。他心自喜。我心自悲。河中有船不載客。還尊中有酒不令客歡。栖栖何者。歸以爲期。絺衣生虱。鞋襪多泥。世人結交。安得常好。他鄉寄食。安得常飽。主人良賢。客興感歎。報恩雖易。受恩實難。野雞嗶嗶。夜長不曉。披衣庭除。月沒樹杪。士貧者賤。客久者貧。不如歸去。可以葆真。

秋日寄豫誠

芙蓉漸搖落。之子曠佳期。日暮孤鴻度。天寒促織悲。黃粮春北舍。紅葉繞東籬。正是登高候。無由共酒卮。

團扇郎

皎皎合歡扇。郎持贈所歡。本欲圖親近。翻掩桃花顏。

古詩

東家善枕席。西家供織作。東家喜月上。西家憂日落。日月同在天。憂喜一何殊。借問東家女。妾有何不如。

東李茂才

風雨朝來罷灌園。東籬散髮望郊原。林深如在青山裡。忘却君家住對門。

寄顧世叔

彈鋏無魚歸未期。他鄉風雨倍淒其。那堪枕上雞聲起。絕似樓頭話別時。

贈殷山人

鹿門高臥寂無嘩。戶外青山郭外斜。婦解綉花君解画。玉窓閒坐鬪新茶。

贈吳少君

一瓢將一杖。隨地掩柴扉。課僕磨長劍。教兒製短衣。詩留閑寺遍。夢入故鄉稀。邂逅還成別。天寒何處歸。

葛理問一龍

一龍字震甫。吳之洞庭人。山中多富室。習爲行賈。而震甫以讀書好古。盡破其產。入貲爲郎。與得一命。以慰其母。久次選人。困于無資。地不能自出。吳橋范質。公典選。識其名。異而問之。曰。得非吳下詩人葛震甫人呼爲葛髯者耶。召之。及堦。奮髯聲喏。質公目而笑。曰。是矣。乃得就選。除雲南布政司理。問及之。官詳視。緩步盤辟。爲禮。頌上官。皆目笑之。居無何。謝病歸。卒于崇禎庚辰年七十有四。正嘉之際。洞庭蔡九達。爲清綺之詞。頗自異於文。祝諸賢以爲獨絕。震甫聞而說之。刊落剪刻。欲追配之于百年之上。已

而年漸長筆漸放楚人譚友夏之流相與尊奉之浸淫徵逐時時降為楚
調人謂震甫之咻於楚猶昌穀之移於秦可為一喟也余錄震甫詩力為
爬剔後除其晚年之變調而震甫之本來面目宛然故在不獨為震甫解
嘲亦使吳之後賢知所以自樹云耳

西湖

黛寫殘山帶郭遙鏡浮新水不通潮堤邊縹馬客投寺花裡唱歌船過橋
紅粉年年化香土春風處處長蘭苕湖心亭子湖心月醉與何人度此宵
九日送客之湘潭

吹帽風初起那堪吹別離纔臨放鷁處已是聽猿時楚服裁應短湘山望
轉疑歸期指籬落莫比菊花遲

桃花源

一澗入蒼烟千花繞澗邊花開與花落流水送流年

潯溪對雨

市斷溪聲遠橋迴野色荒吹來數點雨相送一孤航漲綠平官渡烟黃拂
女桑隔花僧共語東去是錢塘

然諾行

古人之交交以心一語不出然諾深今人之交交以面然諾雖深中易變
古人不可作今人難重陳與君相見但飲酒酒盡俱為行路人

送實父弟歸便往嘉定因寄徐女廉龔仲和

風冷夜窗鳴離愁相對生海潮黃歇浦江岸石頭城窮遇悲孤調殘秋送
獨行舊懽傾倒日不減弟兄情

初晴過孔先生園居得泥字

一雨百憂集好山空杖藜偶從樵採去言訪石林棲屋角蜘蛛網簷牙燕
子泥留懽對新旭不道夕陽西

靈巖山下尋黃二丈不遇

開門見山如見君渡湖相問不相聞籬邊野水淡秋色屋上老烏啼夕曛
鄰人為說携家去更入青山最深處溪寒路狹難獨行短棹空維烏相樹

別曲

具區橋下水悠悠具區橋邊郎發舟郎舟好載青山去免使蛾眉相對愁

曉行

日出已杲杲。西月還相照。農婦餉晨畊。牛衣覆霜草。

舟中九日

九日渡頭人。迎風倚孤棹。江空落日遠。入夜生餘照。無菊亦無侶。開尊自相勞。紅葉點鷗波。青烟出漁竈。

野橋懷郭聖僕

白板斜飛曲岸通。朱欄照見綠波中。故人別處猶堪憶。楊柳西邊蓮葉東。

送范東生之滇南

相念亦已苦。却於離處逢。江聲撼獨往。客路趣殘冬。天盡山忽起。瘴開雲復重。館人蠻語接。計口給新春。

湖上

幽侶過湖上。持醪餉沙渚。對面坐相悅。綢繆以爲語。垂楊圍若蓋。濃陰沃如雨。隔浦掉頭人。扁舟亦來艤。

寒園

玄冬浹陰沍。霜風摧灌莽。寓日鮮幽翳。一畝亦云廣。日出茆簷間。雲生泥壁上。偃仰足昕夕。親朋息來往。空林如有人。互荅斧冰響。

喜聖僕至

爲約每無憑。今宵喜得朋。片雲波上宅。殘雨夢中燈。春冷花如病。齋清客當僧。看山不待霽。把臂入烟層。

聖僕宿永福寺同賦空字

蕭然何所有。瓢笠與青童。住可爲山長。來先問石公。梅遲若待客。松嫩已知風。一宿東林社。花龕對雨空。

贈王德操

無日不懽然。客來猶自眠。會當修禊後。詩在永和前。花氣熏爲酒。山光冷壓船。到門幽草遍。一徑踏春烟。

過金德公墓

相送心曾到。言尋路不迷。草齊封鬣起。山跌浪痕低。片石看人拜。孤花奈鳥啼。夜長誰慰藉。應有鹿門妻。

湖中別聖僕

春湖一胡滿。春蒲一胡短。時鳥鳴嚶嚶。新楊綠苑苑。日半帆陰直。風柔浪花暖。相對自生情。將離復誰縮。雙艫忽向背。行行暮烟遠。

過姚珮卿隱居

瀨淺維舟遠山紆引路徐相尋恐不見相見喜何如積雪村村斷斜陽樹
樹疎門人供宿酒中饋多枯魚歲事將歸客衰遲漸及予松聲動高閣風
葉亂殘書

夜泊長橋同斗一君熙作

虹梁亘一里半入溪花叢縣郭浮居繞江門照影空月寒春盡雪漁集夜
無風語謂同舟客前年過此中

徐日方水亭雨酌

結宇蕪烟際披紗柳浪間新鶯同客到微雨挈春還呼取隔籬酒看他何
處山重來須蕩槳荷葉已斑斑

送陳徵君歸四明

秋風戀徂暑吹動水烟熱與子結新歡孤懷耿將別言從若耶去路指鏡
湖月散髮蕩扁舟荷花櫓前折

澹如過別湖上

早來湖上棹莫是散秋暑呼酒斫霜鱸樂此菰蒲渚分心言將遠離風吹白

鷗起今日與明朝相去五百里

秋陰

西爽忽自晦不知朝與昏井上半殘葉湖中無遠村
枯槁幾日罷農牧相過存雲淡一如水野風吹到門

寄懷李九

思君夏之日日在東園東泉漱松根下石搖潭影中
睹棊來木客司果有徂公昨夜秋聲起惟幾栗葉風

寄雨公

以爾願初畢一瓢行脚寬那知出世法不及避人難
雲月千峰寺香花五戒壇微吟雖自好或得寄余看

松墩

甃石亂無次高高積寒翠一雀懶應門每來松下睡

送恬公東渡

出山何草草曾對幾黃昏落日照行脚白雲空寺門挂瓢半死樹乞食三
家村只在太湖上水田吹浪痕

送衲公之彭門兼寄實甫

落葉滿風寺亂禽號雪園獨持空鉢去何處乞朝昏野甸荒殘燒河堤積凍痕倘然逢阿弟已是到彭門

鳩峰送萬二之泖上兼寄朗倩明生舜五

特地一坏起宛然湖中央與君別於此對酒情如傷寒水照荒路夕風來寺香平生二三友相憶在鱸鄉

可惜

出門卽是客況已渡湖遙可惜藤蘿月看人臥寂寥水西龍渚石崦上虎山橋夢去渾無著秋聲集夜條

小除夕七里岡店宿

歲杪還行役投栖野店空牛衣夫婦對旅況主人同爨壓危簷雪燈吹破壁風一冬更漏接都在此宵中

丹陽作

江流河流決如矢曲防新築巖巖起雲連粉堞兩重城風嫋綠楊三十里小時行遠不知勞每向長安過此橋衰髮還騎款段馬春泥滑滑雨飄飄

鍊藥洲與鄭君熙醉題石上

僊翁鍊藥處荒草沒爲洲一點水心綠客眠如白鷗今年太湖淺添却幾弓闊只恐麻姑來愁與人烟接

觀蔣

計戶各成區開塍直到湖桔槔旋老特篋食走童烏綠自歌邊起雨爲勞者蘇穰穰從此日饑可一年無

陳志玄輓詞

相失知何地風吹滿面塵自騎黃北馬不見淮南春脫家百口累從死一官貧積雪高新塚啼鳥感夕隣鴻泥留跡處鷄絮涉江人泉壤無朝日厭厭得醉民

東村

曾聞東園公住此不復出年年開白花猶是漢時橘

毛公壇

此公得道處山骨何其清草木日與習毛羽自然生

鍊藥洲

前山綠片片。飛出雲中花。欲問仙人居。仙人久移家。

寄周公美

溪雲載屋鶯啼晝。溪漲浮花柳著綿。門外小舟如意去。清齋人起臥茶烟。

訪公病自越中歸寄訊

曲曲三溪路。行行不可窮。田方足秧水。帆亦趁茗風。病得歸來後。閒生坐臥中。松陰空丈室。結夏與誰同。

溪南夜泊

秋晦舟中夜相看。獨有燈隨綠。聊寄宿寧道。不如僧溪對橋雙影雲低水。一層疎疎風柳外。蟲響亂漁湖。

秋晚石湖作

豁然十數里。一帆生雨西。蘋花如欲語。日暮不堪携。漁戶偏新郭。僧田帶越溪。依依爲別處。橋畔柳陰低。

雨夜舟中懷實父弟

風急雨聲亂。颯來愁滿天。不知飄泊處。可有故鄉船。歸路關前夢。殘更枕上年。半生兄弟念。多負看山眠。

得潘昭度新蔡書答訊

故人宰一邑。鳴琴事官守。飛書致予問。可繼床頭酒。予亦問。令君曾似春風否。春風苦不閒。吹花復吹柳。

東凡夫

石作藩籬樹。作隣家。生春茵。與秋蓴。偶遺書法呼兒子。未定詩篇請孺人。巖延甫之楚。復留秦。淮數日乃別。

雪裡看花花裡眠。莫愁飛雪到新年。愁人只有湘山路。漫入寒蘆苦竹烟。花朝胥江舟次與實父弟別。

今日花生日如何。不見花時禽。關別意。歌出柳風斜。曉郭瞰相負。春江綠是涯。同來一宿處。臨別指爲家。

越來溪

草烟綠。奏柳垂低。橋對斜陽墮。影西聽罷。情歌聽啼鳥。吳船搖過。越來溪。兩過茂之新居。俱值他出。

近遠居新徙。尋求路轉微。詎知連一巷。依舊掩雙扉。傳語經旬出。曾期昨日歸。寒蟬在鄰樹。聲帶夕陽飛。

此首後稿尚有

二詩遺于劉補

夾縫中

出都

未盡歌邊酒數

行便騎羸馬出

春明何人不怨東

風裡楊柳飛花

雪滿城

唯陽曲

亂山忽不見萬里

橫空來金光燦其

中冥晦一時開四

野濶三際闊誰

向人語如何西北

塵化作東南

雨

寄懷葉中秘時奉使出塞初還金陵

無數江南樹蕭蕭待綠吹春將歸信及星比使君遲夜火明高壘邊風裂
凍旗間關出塞意惟有雪鴻知

雨渡錢塘同公武

山氣鬱生雷斜風舵後岸青秋雨足天白夜潮回飄泊同吾友艱辛一
酒杯錢塘君若問橋社里中來

舟夜有懷白石山寒山練川諸舊

積雨溪中黑秋天試一晴月來猶半照寒起近三更水勢憑魚立風聲導
虎行夢輕江海闊來往見潮生

清明

今日還留昨日寒一年春又客中拚太湖石畔柴門影魚啞飛花上釣灘
臘八日懷聖僕

懷君八日語五見十年中險阻貧兼病西南北又東南鄉俗各健一粥
遺同木末臨清曉應披看雪紅

八月十五盤龍寺

歷歷三年看月愁燕山楚水白門樓不知何處明年夜更憶盤龍寺裡秋

早過鄒滕

微月隔雲照行將東曙拂細細雨光動霏霏輿夢入青火不出地荒雞唱
纔一殘邑兩三家陰風哨枯骨

新豐曉行

土屋煖堪睡主人燈在門爰循疲馬路漸入遠雞村山瘠乘霜氣溝深凍
月痕隔疆兵燹地一邑幾家存

烟雨樓

烟雨樓頭春乍晴鴛鴦湖上鳥嚶嚶中浮片席空三面斜抱千家截半城
漁網曬來風柳變酒船搖出浪花生夕陽慣照憑欄妓一抹遠山紅袖明

哭從弟實父

白下樓中別東西一夜眠詎知臨別淚落盡是生前

史滄如携棊過訪

櫻桃花開山雨紅有客乘舟雲水東舟空祇餘三尺桐仙人氣骨林下風
姓名不署神相通別云訪我若不遇自彈一曲出門去

風夜宿塘橋

茫然山北水之東，忽露斜光下飲虹。燒燭坐堪銷夜酒，望家如隔妒津風。不禁是草傷心碧，何處無花薄命紅。慙默一春多半過，每當風雨在舟中。

三月三十日

夕風朝雨送行塵，行未成行過一春。綠酒散爲楊柳怨，紅顏銷得海棠嗔。匆匆馬首還車隙，歷歷山前更水濱。啼鳥數聲三疊唱，明年今日對何人。

送徐巢友還山

吾廬在空山，戶牖白雪滿。有樹常謾謾，餘花亦纂纂。城市不可居，晝夜一何短。買藥挂驢背，行歌去人遠。日落深澗中，洗足春泥暖。

今度生日贈之

燕子簷花黃鳥枝，鴛鴦溪水碧天絲。連宵挈酒臨高閣，幾寺分燈看古碑。草聖獨傳章帝法，画山偏妬漢宮眉。今年閏喜逢新夏，添得春眠一月遲。

許茂勳烏相閣

地幽霜肅氣珊珊，小閣高臨樹樹斑。東顧不遙寒水渡，西來俱是夕陽山。連雲送客當秋杪，片月爭題落酒間。撤去四窗留半榻，儘教棲鶻看人閒。

王居士醇

醇字先民揚州人，生而早慧，讀書如夙識，弱冠善辭賦，陸無從，李本寧交相引重，意不屑也。從季父遊，長安日醉市樓，挾妓走馬，人求識面不可得。會麻大將軍大閱將士，先民輕裘快馬，馳突演武場，引弓破的，矢矢相屬，掣雙劍，飛舞雲，忽如崩雪。大將軍降階執手，欲舉以冠一軍，先民笑謝。家本書生，聊用遊戲耳。父母命之室，以羸病辭爲兩弟，納室徧遊吳越佳山水。參二楞雨法師，受優婆塞戒，歸廣陵之慈雲菴，顏其焚修之室曰寶蓋。棲自知時，至結跏趺坐，諸僧環誦佛號而逝。先民以萬曆末年訪余於虞山，葛布白衿，風神朗如也。所與偕游者，以開圖干謁聲跡穢雜，忽忽別去。先民歿後數年，始讀其集，深情孤詣，秀句錯出，知其人澄懷觀道，超然有得。蓋隱逸詩人之詩，而非循聲問景，追嗜逐好者也。嘗自叙其詩曰：客或詰余子之詩，五變矣。余曰：非也不觀少而壯壯而老乎？紅顏白首，是鮐背黃耆之萌也。五變真宰司之非人也。夫變取諸形骸也，觀夫性靈千萬億變一而已矣。余初入吳也，訪上人吳凝甫居士，媒夫詩居。余以山偕誦蓮經，皈依無上士，是詩之益乎道也。日參內典，詩黜浮漫，漸究性靈道之益。

夫詩也道也詩也夫孰能二之折旋俯仰禮之標也金石絲竹之音樂之標也文字聲律詩之標也詩之本非面壁其孰參之讀華陽叟之白雲自娛遂於詩作白雲想想則山河大地無一而非雲也與居寤言無適非氛氳蒼莽也亦猶水觀童子焉詩雲矣何關世世人固欲訂雲哉處茲濁世毀猶食也誰能免食自娛心境一外無法斯際孰云詩孰云我又安蘄乎人之善之不善之者與觀先民之自序而論其世當竟陵騰迴霧塞之日介然自信不欲與之同流尤可尚也而知之者鮮矣錄其詩為三歎焉

餉饑

画餅餉饑人安能克其虛懸雨在半空弗肯及涸魚寧與悍兒處莫與懦夫居懦夫信不足悍兒義有餘

決絕辭

火滅不復然泉出不歸源君心既已死捐玦向平川由來負心人頭上無青天

日珥有引

日珥悲時事也歲仲春五日日生交暈如連環左右生戟氣青赤色白虹

彌天占曰百殃之本衆亂之基且邇年疆內災異迭見兆固不止遼塞也夫遼陽兵務流弊有年當事諸公信其滋蔓用取敗亡之禍致 聖天子宵旰靡寧興師罕捷財賦告匱民不堪命而綠林白馬之徒白晝揚旌江海之上官兵莫敢誰何吁全盛之朝一至於此乎余藿食一丘杞憂何益第恐不能安枕白雲遂擊壤之私耳昨聞新詔優恤北關餘裔西虜感恩大化無外群醜尚敢奮螳臂乎共述短詠十餘章觸事成驗不覺其辭之無序也錄五首

連環雙珥夾晴日左右生戟氣青赤豈惟兵甲生外夷百殃之本衆亂基前月黃霾泰山側青龍吐火煙光黑去年御溝流血波天鼓滿空擗海鼉又看彗星掃空百餘丈徹夜光芒侵斗象遼東軍民半陷胡天復示變胡為乎

狼煙夜照大安戍胡兒夜縛將軍去駿馬馱金曉贖婦正陽門底捷書飛清水照面不照背分旄使臣日似醉番兵時入如向家杯水詎救薪一車幕府覃覃隱奸士受金洩出天朝事

鐵嶺將軍載輜重避胡入關妻子共先議和戎之遠猷蠟書暗約殺杜劉

經畧潛謀玉帳底。四帥北征撤回李。窮荒深入絕援師。六萬漢軍空戰死。
於戲衆關那及鴉骨關。六師魂返李生還。不知廟堂邇何議。代李者誰是
其弟。鴉骨關李

戈船健兒不習馬。兵氣無能震屋瓦。羽書調入白狼川。去傷此日歸何年。
南人膏血濺北虜。餉金百萬消如土。兵馬空多策未深。封章徒乞內帑金。
緋袍昔走金山寺。拳石焉能著多騎。蠻女新兵簇塞雲。成功或在孃子軍。
牛毛寨頭屯虜營。朝鮮請援詣漢京。已喪義軍荒磧裏。難保鴨綠一泓水。
危今因我危。死昔因我死。將赫斯怒安遠邦。當爲犄角守鎮江。君不見金
台什。前車覆事到噬臍。將安咎。

畢仲明侍御邀集西清館聽文兒謔

平波削玉天倒明。綠綃輕縹涼颼生。芙蓉千尺迴繡楹。一枝含艷忽有聲。
圓珠瀝瀝溜盤走。不斷柔烟醉春柳。燕點鳴泉滴暗冰。微啼征頰背紅燈。
林間輕籟時能止。斑竹鸞絃幾迴死。蠟花半剪夜色遙。况復霞疑酒暈嬌。
欲邀眼笑心先蕩。得近衣香魂已銷。此際心魂餘幾許。不如離却寒塘渚。
且向花龕懺有情。高樓睡掩秋山雨。

題馬姬湘蘭所画蘭竹卷

寒映秋芳數枝玉。冰綃宛是湘江曲。能使湘靈愴別魂。瑤瑟泠泠怨秋綠。
霓裳奔月留難住。錦衾紅燭生愁緒。墨花化作秦淮雲。猶向粧樓日來去。

桃花阡

南阡桃花花叢叢。花枝曉動陰濛濛。溪西碎錦飄溪東。綠波不綠紅映紅。
天擲綵雲墮。花下一杯香泥封。艷冶子規愁春哭。春野血和情淚胭脂瀉。
前春醉花金屈卮。桃花羞殺歲蕤枝。金鏡永絕明月姿。花阡無主醉者誰。
何須亂眼花如許。遍覓芳魂無處所。陰風拂林狐狸語。傷心歸去桃花雨。
夜同曹野臣宿西清館

夕烟如雨滃山脚。烟際園林隔層幕。遙燈一點透微紅。正月花枝閃螢燭。
路窮石子橫塘角。小門輕響迸魚鑰。紙幃絮被重重閣。新詩攬思眠難着。
十載清顏夢中索。此宵是夢翻愁覺。

吳門送劉元博遊楚

芹芽淺淺江淥深。江南画船載楚心。因君余夢瓜州渡。期君水宿夢相遇。
梁間敝笥江底魚。三年意密見面疎。寫與苦謔伴千里。峽夜啼猿疑在紙。

早秋客舍憶故山

何處非如寄一山安足云秋來倚林閣日看度江雲客况層苔老疑心雜響聞遙知溪墅月坐少一人分

新秋夜坐

水煙涼獨夜坐惜幾家眠僧閣掩深際磬聲生悄然竹婦人意淨螢漾壁光圓鄉國方隣亂幽心忽易遷

過月公故廬

又向何塵內隨緣轉性珠自非趨寂滅人妄見空無野日山房掩寒聲雨葉枯昔依松柄處杖淚一燈孤

逢病軍人

迴望魂猶亂歸支病緩行道傍將掩骨塞外即前生店主辭孤宿軍裝付破城便令身戰死序績不知名

無聞上人許留栖吳門不果送之還山復訂春期

若未曾期住雖離豈怨深定知孤寺語那入向山心窗燭思前影江寒念晚陰成言不可倚况復望春林

憶

前期知已絕猶待碧江濱往事不可憶微恩何足云人寧如舊燕心忽化浮雲莫上花西閣簷間有夕曛

病

筇影雖離戶無能落近隣多眠常廢晝如醉暗銷春面改翻疑鏡衣寬似借人未從空際得莫歎有茲身

逢黃改之歸自遼難

戰後念彌甚誰如脫虜塵茲逢謂非汝翻問在傍人測變先群慮全生又一身死恩丈夫事安肯逐降臣

促織

風露漸淒緊家家促織聲牆根童夜伏草際火低明入手馴難得當場怒不平秋高是餘勇一憶度遼兵

曉出田間

香稻欲辭野村家無整眠雞聲動高樹人影亂秋田殘火猶照屋清詩時隔烟東溪舊業廢疑思在驢羈

松下

莫言斯坐易，雖我亦來稀。野色不相忌，人顏安可依。鼠驚寒吹落，樵束亂青歸。根下沉眠者，方知生世非。

不出

將買谿西曲，幾家梅樹邊。泛交思可畏，老骨望安眠。白業融詩性，青山迂世緣。弄雲真不出，第未定何年。

客居

斯世盡浮客，一城聊寄身。飲須求似我，炊自不因人。草色閉門老，菰香離水新。幾圓松際月，居此未知隣。

一秋

一秋宛馳駟，志士感何深。隨事涉虛境，與時銷烈心。行慙窺止水，坐不耐疎林。繫日方無策，仍傷老病侵。

殘漏

層戶昨已閉，下下何到茲。最難酒醒際，正在燭殘時。斜月不肯落，遠風非與期。東征幾家婦，惜夢有餘思。

去福正

城隅

城隅極秋，日暝色又閒。津無樹不歸，鳥好山皆屬。人遊應似湖，冷詩且送愁。新去土終非，策男兒媿有身。

見落葉

朝來見落葉，因悔向林行。飛鳥不無意，何人非有生。枝容昨夜月，秋減一村聲。轉禁樵童入，留茲長道情。

山中廢宅見古琴

廢宅何遺此，終年掩暗塵。絃殘空抱響，谷冷未逢人。餘趣思纖指，全身總剩薪。轉虞婦俗士，沉沒任山春。

道中懷周元修

正悲前度別，茲別更何安。黃葉水西路，晚風驢背寒。出常憐我獨，聚反失冬殘。漸逼他人面，天涯意所難。

舟夜聞絡緯

漸傷空杆軸，為響亦徒然。汝力雖無惜，客衣曾未全。殘燈孤舫思，秋艸半江烟。獨不關心者，篙師正倦眠。

贈林羽仲

業廢歸無定年衰見屢難詩名半生過客舍幾移安少已深邊策貧聊就
幕官西風蕪江郭猶有故人寒

悼星上人

乍逢傷永別交惜在逢前肢弱易為病心靈翻損年緣隨一念了詩到幾
鄉傳孤塔寒花外鷺聲愁暝烟

廣陵感事懷張異度

江介烟霜入孤舟悔泊時違心不敢說別汝益相思世亂生為誤身貧病
易欺憂如衣未浣何以寄將知

春林欲雨

長林氣忽暗本欲奪晴春愁動初芳色知先老病身閒居成短晷空閣倍
寒人礙我聽鷓出野醜香漫新

西村雪中寄程凝之

頻枉相尋屨能憐客未安不令筠影獨翻隔雪花寒無夢將驪續何憂比
序闌近情難寄與君向出遊看

寄吳社二三詩僧

花壇僊梵畢拂石坐秋吟語到新方止思於靜始沉江烟寒入寺野吹夕
疏林此際傷離急雲山落遠心

秋林閒坐寄山僧

秋暉蕩夕痕秋意到林根坐寔有深入靜猶多一言馳波忽似住落葉不
成喧野衲可知此空山應閉門

季遠贈衲衣

預關風雪念贈暖到巖阿獨匹成繁指千針捲密波受因身尚在曳稱寺
頻過顧影俄臨水茲時祗髮多

遼野戰

笳聲先陣至心慄半無聞相視絕生色滿前皆死雲鋒纔沒餘響鬼誤是
殘軍奏草推元帥能無悔所云

秋水開士歸自南海

春洋歸似夢未見奈思何險向聞方半憂非到始多薄衫寒遠雨旅色帶
餘波莫叩南詢意靈山肯漫過

寒夜宿程彥中山房

計時方一見一語一情生孤墅遂成趣寒山非獨清衆烟沉夜色空雨定人聲眠憶未眠處夢中携手行

昔園

傷心履跡斷園在主人池水將憎影山花嬾蒨春孤情難語衆舊客反成新悵此維鳩意聊支衰暮身

慰林羽仲

幾日搖鄉思孤燈夢海涯久離驚得信垂老哭無家暗恨煩支骨餘心冷到花黃昏隣寺樹未敢聽慈鴉

微月照疎雨

月痕雲半罩窺雨在簷端疎影成絲辨微光裏濕看斜明風乍側分映露初溽滅燭山樓夜幽生幾曲欄

雨集高君佐園亭同鄧林宗張卿子

妬花無可飛晴不驗斜暉新水拓魚界亂煙層竹衣病多如醉少情密覺逢稀語及貧交外難窺人意非

湖園訪王修微

栖寂將疎客猶令秀句傳見能深道想交或在詩綠湖水別成態山花休浪妍淨心何所印臨鏡綠窗前

延季居士種花詩

誰能了空意因示數枝春色但隨根現花聊過眼新護香栽刺遍界綠委泉勺豈必來遊者方爲借玩人

豐谿逢王靈運話舊

自說握中鏡日禁繁恨加頽年且風葉昔境已水花哭子數回病隔村幾里家羈栖今不遠步出巷門斜

秋夜次栝齋中坐雨

群岫掩朝翠預知風雨生雖妨尋寺約稍減應人行嬾竹沉秋態遙春裏夕聲冷烟飛入戶爲戒客衣輕

過吳幼時別業

嵐裡人家滿遠栖人外閒與君坐芳草隨意望南山花氣微風際魚苗新水間蒼苔見虎蹟未及夕陽還

花谿春算

蒼蒼烟嶼西掩閣。臥花谿春不邀愁去。鷺來攪夢啼。他鄉三月病新綠。幾枝齊搗藥。茱檐下。空林日又低。

荅王亦房病中見送北歸

遠別惜多病。一帆停浦沙。翻令倍含戚。不減昔離家。江路積梅雨。客衣生蘚花。後期淮水曲。莫使怨蒹葭。

秋夜酒家所思

堤館能留醉。當爐艷似花。秋槽分滴酒。夜火映撈蝦。風寂山猶響。江清月自華。所思隔煙水。離恨起蒹葭。

冬日客中送章結父

一日幾相見。歲闌翻遠離。莫將歸客意。說向旅人知。獨雁追寒陣。枯桑語凍枝。板橋春水綠。憶照竝行時。

虎丘山後訪張叔維

磴杪見山盡。入迷煙構重。非尋獨栖客。不度一層峰。春望屬閒野。幽心宜遠鐘。還期投宿夜。月出寺門松。

送仰之上人之廣陵

春寒衲一層。片笠挂青藤。相別每憐客。不歸何異僧。津遙投夕雨。波淺暈舟燈。欲倩傳雙淚。柴門到未曾。

贈茅遠士

層閣澹陽景。落花深晏眠。起乘沙淑舸。或蕩寺門煙。續醉夜歸後。遣愁春夢先。時摹玉板帖。買繭作冰箋。

訪屠瑞之

園桑藹霽暉。戴勝貼枝飛。隔水客來少。到門人語稀。趁船時一出。中酒昨方歸。欲見獨栖意。短簷橫翠微。

蘆

昨夜邊鴻栖。幾行練花十里截。迴塘西風橫。水自秋色明。月照汀分冷光。遠送繁聲滿江店。時吹亂雪在漁航。南兵正戍遼。河畔捲葉愁聽。虜曲長

哭黃元幹墓

下馬涼風吹墓村。昔離誰謂隔重原。轉因宿草淚猶下。誰種寒松陰漸繁。長夜何年歸遠骨。深山片月主遊魂。可憐香閣啼紅妾。銷盡桃花滿鏡痕。

集嚴道澈雲松巢

園徑蒼蒼煙藹間。画欄人度板橋灣。簾衣香骨春殘絮屋角。青飛雨後山
松吹暗。搖琴曲冷。池波深。照客心閒。銜杯不使疎櫺閉。巢濕紅泥。乳燕還
文文起掩關。葯圃却寄

短墻傍市鎖煙鬟。孤客凝思。罨画間。飛夢不曾離一郭。傳書翻似隔重山。
世塵惱眼。聊思淨花事。關心恐未閒。小簾疎窗留醉後。幾虛清月照池灣。

開元寺送朗道人視髮廬山

芳草萋迷閉曲房。竹林芸帙一燈光。常悲逝水因除髮。偶看浮雲遂別鄉。
煙月待吟開遠岫。江妃聞梵禮孤航。淨心好過東林寺。尋向蓮花印舊香。

寄李達生太守守巨津

郡為梓國屬土官凡郡守皆住省城不之

筓蠻遮在碧煙叢。浪說車間已画熊。官舍轉離孤郡遠。家書常隔一年通。
誓分篋葉香消瘴。布納桐花軟貼風。鄉思偶停時出郭。閒看調象亂山中。

寺居答陸無從先生六韻

還鄉亦是客。栖寺宛如僧。麥飯邀孤磬。花龕熾一燈。夜寒分白氈。月好借
青藤。病起惟嫌雨。心清似結冰。所思窮巷隔。相望亂愁凝。幾日東林下。秋

風落葉層

曹山人臣

臣字野臣。歛人崇禎戊寅。余識之於長安。角巾布袍落落。有逸氣。知余有
書癖。數為余訪求古書。後歿于白下。野臣詩真。搜苦索。不由康莊。轉入僻
徑。自定其集。曰鬼訂。以為非時人所知也。哭友二章。哀怨悽惻。善為苦語。

郝公琰墓下作

郝之璽。今已矣。憶君棄我已三年。一棺裹骨黃泉裏。我欲呼君君不起。慘
相悲。松聲聒耳。幾草瘦。草不成叢。是我頻來淚澆死。死亡者不生。生者必亡。
前後差期。鬼路茫茫。譬如作客。指此為鄉。客倦歸來。晚聚一堂。君如有約。
君莫忘我。謹待君蝴蝶床。

哭閔子善

前年我作石城客。送君渡江買浮宅。去年我却歸山中。聞君又踏石城石。
今年人從石城來。曾說君軀病欲頽。常想天涯瘦軀影。誰知削影投蒿萊。
嗟乎閔生一死無不可。可憐老母家中餓。面皮皴剝登成文。淚滴欲流兩
邊過。自從兒作浪遊子。倚閭望殺廿年矣。尚謂無夫更有兒。有兒更向他

鄉死母乎母乎悲莫啼四山崩裂風淒淒山崩風淒母不久誰當掩兒又掩母

王遺民鏞

鏞字叔聞金壇人恭簡公樵之諸孫也數踏省門不得舉閉門下楮讀書尚志欲期古人於千載之上流俗無知之者中年薄遊荆湘又依其叔有三之長安國事日非東西交訐登臨吊古憂時歎世胸中塊壘發之於詩往往牢愁結轡不能盡其百一歸里益不自聊屏居郭外游于酒人日沈飲自放而已亂後每捩衣循髮以不即死爲耻悲歌流涕有沈淵立稿之志一日從里人飲大醉病臥三日遂不起丙戌之十月也年已七十矣叔聞送人下第詩有一夕殘秋帶客還之句吾友于中甫見而激賞之命其二子從之游中甫二子之能詩多自叔聞發之余游于氏父子間最久而不知叔聞丁亥冬過金壇得其詩於御君篝燈疾讀俯仰太息當吾世有叔聞而不能知且叔聞或知余而余不知叔聞余之陋則已甚矣然世之習叔聞而不能知讀其詩而不能識又心薄之者不少也昔人有言親見楊子雲祿位容貌不能動人又況以其爾雅之詞深婉之致進於攘遺拾

潘東塗西抹者之前能不盍然而笑乎然則叔聞生而不見知于人死而吾黨思之爲之徬徨追賞亦未爲不遇也若夫叔聞之晚節又當與謝臯羽鄭所南齊名于千載之後後之君子頌其詩論其世將有如吳立夫程克勤者采而錄之余又淺之乎知叔聞矣

病餘存草自叙曰癸酉秋七月望日日中忽嘔血二升眩瞀仆地肢骸靡渙獨此心炯然念身世無可戀唯平生吟咏是胸懷所寓而悉委墮不收不能無念旣而不死從此自矢隻字不遺每有所得輒塞一小竹筒中匝歲幾滿然皆在爛刺尾廢牘背又醒時所作非醉不書點畫款傾壓疊久之幾不自別雖曰不亡猶不存也去年八月向疾復作幸不至劇旬日便瘡念幸不可以屢徼因倒筒出之淨寫一本幾及百首適被牽迫浪遊衡湘携在笈中而是時流賊猖獗犯陵寢屠邑聚道路梗塞歸棹無期在祈陽僧舍作詩云風波盜賊五千里況是衰羸近死身悔帶病餘詩一卷不將淨本付同人益恐其與此身俱沒也嗚呼平生自暴棄不收拾者莫過于余然每至疾病流離生死之際未嘗不拳拳焉固知翠毛象齒不惜其身而惜其所惜有不知其所以然也因題笈中所携爲病餘存草上卷

而彙楚遊之作爲下卷倘得歸偃園林徜徉歲月或便增卷帙而移甲乙未可知也時崇禎乙亥八月朔日酒後書於衡陽客舍

貧賤別

東郊野水瀕雲白萬樹嘶蟬生暝色弟兄貧賤易飛分氣愴尊前辭不得更須質酒送君行酒盡須還不計程細說江頭岐路錯共眠船底月華明人生三十行已矣榮稿存亡未堪擬一屋同居媿士衡十年減產知張季相望行舟一葉飄孤舟倍覺路迢迢轉喉有意淚相噎背艣無言魂自銷寂寞歸眠對蔓花對花獨醉更咨嗟寄語莫言爲客苦縱非爲客亦無家

七月十六

歸眠秋寺鐘露氣撲晴空叢翠安圓月莖朱抗細風翻翻遷樹鳥唧唧傍燈蟲坐想前年夜清江泊釣篷

喜張公撫至

南山豆可摘之子遠相存痛惜經年別詳謀達夜樽砌蟲參客語園草漏燈痕新句佳堪味深杯許細論

道悶

懷壽酒仍凍淮南子云離歎終年人不來殘燈聽暮雨孤館見新梅裹飯誰相問陳芻我獨哀奈何兼數事總付掌中杯

于惠生彘中聽妓二首

画苑夜泱泱瓊卮下酒香鴉啼深院月梅影隔簾霜箔霧雙鸞出裾風一燕翔錦屏圍燭艷笙鼓改華妝

捧咲名花綻宮衣百蝶爭遲來循珮序被喚應香名罷舞腰肢在迴歌眼尾傾峽雲真可賦宋玉漫多情

北固山後石壁

北固孱巖背滄波洗削成入天翔石勢積鐵障江聲壁影蛟龍動枝風鸛鷓鳴孫劉千載意未與草潮平

留別白門同病

濩落猶諸子蕭條更此身自知行有恨敢謂至無因是石吾宜別非竿世莫珍匡衡經易詘孫寶道難伸帙冷囊螢燼門蕪食雀馴秋期松寺杳夜逐酒燈頻瘡苦椰揄鬼貧甘俯仰人奏廷書未乙丐縑紙徒申洞口投碁局城陰給釣綸叩門惟劇孟斷席共田仁醉泥寒雲外行迷夕水濱自竒

雙履跡誰落一冠塵山黯浮空髻江明凸地銀染村楓色敗薰画袖香陳
旅食嗟何賴鄉醪報已新扁舟東下疾烟霧隔沾巾

過蔡一卿故居

空魚人至鳥飛迴始覺山陽一笛哀心似去年秋病酒臥它僧舍未歸來
題上林賦後

秋風天子阿嬌時蜀客風流入夢思携得遠山圖譜在篇終特與寫長眉

馮衍

馮衍才華世絕倫時清主聖不容身江淹賦裏誰堪恨獨有關門對孺人

偶成十八韻

石顯方含憲匡衡實要樞甘陳功屢抑堪猛眷終誅奏固陰司草阿新浪
結徒禍胎成唯諾國柄博睢眦日月寧無照風雲亦有衢大橫芒已耀小
畜血仍乎巾褐無遺窟旌蒲更滿途一開鉤黨禁復錄矢忠儒喜簿初矜
寵哀郎竟戮諛降婁門莠爛渴蜺井桐枯紅朽群窺指高明魅嘯呼登墻
負子險據地勿喉愚受爵一方怨辭權萬指狐真人疑冠玉假鬼詆匏壺
子羽何嫌面維摩好施鬚悲歌終日夜樂酒且須史門下誰彈缺閨中孰

竊符蔡雍倘相識定爲一長吁

讀從兄南安令崇禎太平曲有感

洗眼乾坤正回頭日月新百年垂半日千載中興辰鳳下輝堪攬河清頌
好陳真逢擊壤樂猶欲叩閭申憶昨衣冠旣將舒刀鋸噴風雲資腐質霜
露落饕唇蘭綺三宮擬桐封五等頻傾儲竊弓玉空廐賜麒麟金虎通嚴
寢城狐列要津貔貅符悉縮鷹隼翅虛振對簿陳公老收貲蕭傅貧忠肝
塗赤石義骨莽黃塵獨座生令喜諸生死效輦山河青海並俎豆素王鄰
不媿曹嵩假寧憂王莽真遺弓安箒業憑几密絲綸光夏傳家吉從商及
弟親三靈呵壘紱九廟集吟呻呼吸皇圖鞏張弛祖德遵威弧入手勁衢
酌匠心勺艾捷三年效叢收七日神天恩正稠疊霆斷不逡巡豕肆然燈
腹輦經衣寶身剝膚消積甲按月輦亡珍一洗宮庭孽惟餘旃厦寅山龍
蠲澤國簡蠹課嚴宸花靜崆峒晝雲遙雒水春乙書延偉論甲第佇勲臣
幽魄含彪炳明姿出曖堙望雲同夢寐吟澤破酸辛飯糞家家備醢觴箇
箇醇黃龍神雀降丹甌白環臻斯世皆醴粹吾兄尚隱淪西川豪傑士南
國放流人拔薤威誰匹吟花語絕倫偷金逢怨口酌水別遺民強項違廷

簡冥心愜野尊聲非五噫激文似九歌馴黼黻皇猷爛丹青帝德純如無
青史采定下紫泥詢樸籛終相倚浮華蚤見甄飄零傷物役衰謝困躬酌
鉏止公畦稜行窮陟瀆濱扣舷隨汎汎持翳入蓁蓁笛灑時牽鯽竿及夜
揭鏡龜巢知足雨鳥食卜盈困小賦誇烏柿遐瞻陟白蘋時清角里隱主
聖務光跋壤室琴聲滿繩樞轍跡湮因歌太平曲停酒拭烏巾

燈下無酒戲作

垂簾深草映秋缸上檠秋蟲鼓翼雙欲探蘋花招遠客倍因尊菜憶澄江
和烟樹色時沾榻帶雨鐘聲夕殷牕畢卓有愁禁獨坐比隣白藥未開缸
立春一日之夜自戲遣悶

潦倒胸懷吾自咲支離身世或加哀豈知蘇子逃禪地可作周王避債臺
社肉難分思拔劍春醪裁溢已空杯夜深吟罷無歸處醉倚疎梅幾點開

臥疾秋郊雜咏

自臥幽林白雁來兩看圓月破蒼苔美人曉隔葭枝露村釀宵寒柳瘦杯
山葉搖搖待黃落溪花冉冉退紅開愁心正似歸栖鳥每到斜陽有一回
輓于中甫比部

秋色招遊絕素書林亭烟靄正蕭疎張衡未老玄謀歇蔡衍纔亡黨禁除
庭露半霑蟲網破隙光斜逗燕巢虛可能盡舉平生好惟有驢鳴送旒車

京口旅中作

江城月動長潮時烏鵲驚飛乍著枝寒截雁書峰影銳光翻龍穴斗杓垂
慙無風翼資南徙喜有霜螿伴右持可愛主人扉板白深宵酩酊爲題詩
西成獲稻數十斛輒分三子一甥二首

九齡文弱驕庭寵三十清狂恃母憐常謂優游堪卒歲不知飢凍逼衰年
孤生馮衍陶潛後譬死男婚女嫁前從此折筮煨粥外赤髭白足是前緣
廿載干時十載耕一朝都罷若遊僧相如篋底消雲氣元亮鉏頭翳月明
畎畝已教羸稚服餅壘未免對妻爭家風似此真堪賀只少參軍五十荆
邑人蔡參軍少貲鉅萬以豪華蕩盡晚年不能給其諸子乃各杖而遣之
明日周侍御往賀蔡問何賀曰昨聞尊門析產長君五十餘三十也邑中
傳以爲笑故有次章末句

血病後擬寄段季純

唾血貪杯老應之

張應之歐陽公友也累然唾血病中恃爾鎮危疑敢言不廢飲酒而得長年故以擬段

四藏猶堪活恐對三騶不自持照水紫薇霞紫處遶籬黃蝶葉黃時秋光
漸好身將健涓滴初開欲共誰

賣牛二十韻

搏煤且捏脂馴健里牛兒鬻粟初收買薪芻自料支冥心忘祿爵親手駕
轅犁骨隱臆新滿蹄強齒尚差耕鞭一不下秣草百皆宜醫豈煩千頃備
仍費五皮語喚應牧喚戲腦觸童癡念爾三年力嗟余十稔饑兒甥分瘠
確僮僕自耘耔朝暮誰收放宮欄合改移近邨聞駿駛即日具錢資書券
駢髦貴始黑犢壯而赤也離門紫鼻漸價收仍買劔恩在為留糜市例以餅牧豎糜為決絕餘工去隣翁乞耜來紫氛休投道白石罷干時僅有田桑興還同鉛槧辭
買僮猶里巷放雀只樊籬飼養應逾好經過會有時銜恩倘相識顧主必
餘悲歸去收書卷長無挂角期

絕句六首

曉聒東鄰賒早秫算敲西寺寄遲眠盈圍髻髮今成蒜饒爾清狂更幾年
常思見面人多逝未得開唇事已休半世營途成跛鼈十年問舍得蝸牛
花朵正憐多鞦韆花柳梢偏愛小差池陶潛狹室誇容膝庾信低牕訴

碍眉

門延宿鷺藤蹊細園報高秋栗罅粗無酒少留醒去客有箱多貯借來書
久許來還賒酒債只言去索作碑錢自今有物時相抵已度橋門作釣船
烟帷瑟怨九秋蟲霞錦書濃萬里鴻未得振衣千仞上直須埋照一杯中

秋日與史子裕沽飲東村次回忽至

店依喬樹鄰官路路上人多識醉翁那管脫巾頭共白只憐對酒葉偏紅
樽邊籬落生涼影林外風烟積暮空不是此流南巷客深村誰肯遠相從

風寒

林戰飄風霹靂奔推雲擁霧日西昏質衣換得行三返握粟沽來止一尊
呖呖吹窗燈欲滅蓬蓬衝屋瓦頻翻明朝陰雪晴霜冷不是高人也閉門

謁張睢陽廟

並摧逆虜滌函區郭李全師公一隅六矢將軍寧計面千金愛妾自捐軀
荒宮雀鼠兵威在遺貌須顛史傳符稱公須自笑經生老無意只思架上試抽書

哭馬甥三絕句

若敖今日魂真餒，殷浩當年愛頗深。如此哀傷豈能久，也知淚灑暫時身。
只恐身由淚結成，一朝漸解了餘生。當年下第都門道，白日荒荒記此情。
汝樞婦墳婦大婦，淒涼一室到人稀。恩深知有遺魂在，閒步庭莎倚落暉。

夜歸即事

繁星簪林門爛熳，如箒把婦人趁餘光。大吠盈四野，牽蘿發浩歌。篝火高
林下，歲徵在恒暘。腴畝獲枯苴，穀磬杵白間。斯聲聞蓋寡，三冬苦飢餓。橫
征恣敲打，不聞酒囊枯。增壓裂不捨，幸無巢泚徒。中原已戎馬，誰能採芻
蕘。稽首告旃屢。

雪中自咏

破帽遮頭趾印塗，尋梅乞酒一狂夫。那堪授簡供文賦，已自披簑入畫圖。
夜牖有書非少日，曉村無跡是吾廬。虛言耳熱能消却，其奈銜鬪汁滓枯。

日暮

膾底東風絮白雲，爛頭細雨草紛紛。五花亂上冰魚隊，一線橫過石鴨群。
水鳥數百為群，單排橫行。年譜只憑工部句，生涯難倚斛斯文。可憐寤曉愁長夜，坐滅
寒爐待一曛。

新春

衰年樂事苦蹉跎，莫到梅花又浪過。霽色園林猶雪霰，晚風池閣已烟波。
鱸非張翰家鄉少，虱是嵇康性分多。隨地一尊堪肆志，更圖身外欲如何。
野店

縱橫柯幹壓茆茨，新霽明陰合綠池。舞燕故來穿窳牖，啼鶯不肯出帷枝。
家貧延客常過此，村近扶衰佇倩誰。正恃東隣賒得熟，杖頭未必有錢携。
將之衡陽阻風京口

九江道中

繫纜千檣萬索中，蒜山西畔大江東。青松自罩疎寒影，白浪相吞壓疊風。
偶爾因人成浪跡，可堪臨老作漂蓬。旁人盡笑無些事，欲訪天南迴雁峰。
離鄉已遠斷鄉愁，風物無邊飫浪遊。異壁烟霞常共色，一灣鷗鷺各分洲。
青山雜樹陶潛縣，明月孤城庾亮樓。身寄片帆如過鳥，舟人指點屢迴頭。
九江城外二絕句

百花亭畔梅全發，五柳門前草不凋。賈舶分風兩頭去，渡船雙槳一人搖。
水禽踏浪飛還走，澗草銜花臘已春。漸近長沙卑濕地，斜陽萬里起層陰。

廬山

洪波搜石根土盡石傾壓虎豹攀猙獰窺盜踏圓滑雲膩古洞寒雪浸芳洲
苗不知灘渚寬妄議波濤狹尚注湘江三猶吞雲夢八羈客纜舟莫居人
收市臆不辭鄉國遙直感年華匝村雨衆雞鳴汀烟一鴻發

湘陰嘆寄次回

衰齡薄俗交相厭裹足終朝守華門遠出不過三里路卜居常訪獨家村
溪梅手剪捎雲秀窓紙親糊貯日溫只擬三冬安偃曝誰教百舍歷崩奔
長沙卑濕災殃窟湘岫芳菲涕泪源駭電愁霖憐我老握蘭懷芷與誰言
烏衣自昔專篇翰南巷由來共酒尊急草移文招隱看不然便欲費招魂

薄葺

獻歲南征棹依依帶夕陽侵春芳草合入夜碧雲長浦月交珠彩山風送
酒香湖上幸無遷謫怨作賦不投湘

湘江雜詩二首

落帆偃草住違淖上山行湘北千峰雨衡陽半壁晴雲頭埋鄂渚日脚洞
南溟異境真堪賞無錢取綠醺

水際朱陵驛山顛磴道懸連峰綠岫外斷雨白鷗前巖篠垂還起江雲濕
亦鮮可知帆席重那怪路遷延

衡州旅舍二首

行極天南仍賣文屠沽開裏掩重門夢過青草連山浪醉哭蒼梧入廟雲
歸計因人終日誤鄉音隔賊幾時聞故園荷葉田田盛可得霜前製翠裙
蕭撓何處等閒開石鼓旃檀廻雁廻秋蚤三湘峰瘦出雨餘百粵漲肥來
過江遠看嬋娟竹捫字閒挑綉蝕苔就使殘生歸不得一茅應傍祝融堆

寄題南岳

映林泉落雨濛濛收得仙書鳥跡空冰雪千年稜石雜虎蛇一窟老僧同
聽雷打上纜山半看日歸來可夜中正似清光漾舟客不須身到最高峰
少陵望岳詩云渴日絕壁出漾舟清光旁又云牽迫阻脩途未暇杖崇岡
蓋亦望未登者

七夕

悠悠湘竹斷娥皇萼萼巫雲待楚襄淚盡便成千古別情深堪待一年長
九枝燈焰侵微月七孔鍼囊解暗香空擬乘槎問消息黃河無影到衡陽

衡州不見天河疑黃河遠也

湘江絕句五首

崖石列砢砢江漲所漱出豁如無齒口軒笑不得合
明峰與芳岫進退相摩行兼之白雲天秋色凡三層
同舟白木人雪色何氤氳忽有飛來者方知是鷺群
日帶東峰影斷續照西岫下有江半陰上有山雜亂
白霧起江面繚山如平垣餘飛未盡處猶作雪漫漫

湘潭

湘邑城根與水連客商南北總停船秋江浪響罾魚柵晴野天昏作炭烟
旅楫迴還行萬里家書斷絕已經年更堪三老私留滯指點帆檣不肯前

算山

過盡千峰萬嶺幽烟蒼霞紫簇深秋每迎客棹江迴口都疊漁村樹上頭
缺處輒餘重處補曉看不及算看稠從茲百變陰晴態送到瓜州與潤州

瞻風帆

江闊無憂風色橫瞻帆亦得達常程画屏峰下流觴過碧玉波中曲尺行

已有烟霞供秀豁更兼天日借晴明眼中便是湘陰郭取得秋醪定九成

算

風急浪聲作日斜山繚多偏帆行不駛輟棹宿如何古廟叢篁徑孤村亂
石阿此間宜可住水鳥上低窠

是夕聞雁

蕭蕭落木黑波生燭暗杯空三四聲蘆作綠花枝尚脆菰垂白露米先傾
我來賓至飛迴處唯衡陽之始歸驛君向人歸厭歷程燕子輕身真自喜不
堪此際有逢迎

落照

落照秋風一面晴白鷗群雜浪花明雲連匡阜常無頂江到潯陽暫有聲
帆席好風歸范蠡烟波新月属袁宏到家自有清溪釣不羨滄浪唱濯纓

淮安城樓

屈注清流作帶圍高頭三面擁澄暉蛟龍臥處烟光重天水分間岸影微
梁帝人民魚鼈是淮王雞犬井廬非凭欄喚得南飛雁來歲於今伴客歸

述古二首崇禎初年

聖功既罷相宋主疑其愁以是待大臣立朝皆身謀錢公用感歎拂衣示
無求臣節與君恩貴有餘地留五刑秦丞相一表宋齊丘視景恐不去乃
祈玉燭休

秦法如牛毛鹿馬乃失寔漢弘吞舟網廉耻蠲隱隱御精馬竊銜燭張飛
蛾集人情小開通網紀則大立如何旒纒地燭暗勞日月小臣伺腹心兼
恐成妖孽

出都

淒風驚馬露沾衣作客經年獨自歸月側宮城鴉未散秋高關塞雁初飛
已裝故籍空囊滿欲問迴程是夢非枉說長安足波浪白鷗來去總無機

凍醴

傾家五斗米衝缸三斗水一夜北風霜長稜生榨嘴君勿嫌其薄洗袋副
未已猶足勝沽來推恩到奴婢一笑呵凍硯援筆賦凍醴

上巳日園梅始盛開

此日常年桃李開冰蕤初發見谿梅也知清好鷺鷥伴要等風流燕子來
待月閒情但孤颯下風小立每遲迴落英正想孤山道一尺裙腰厚處埋

跛乘跛

長塗騎驢人行步何坎軻豈惟驅不進跼蹶屢欲墮經過顧語之自行何
不可策此且乘危安得足尚畏其人指足言畜疾則如我君知行者蹇不
知蹇者尅吾爲笑絕纓請以小喻大齊桓中主才仲父膺衽左劉禪駮孺
子諸葛延王火苟能馭騏驎千里致安坐君跛無奈何奈何跛乘跛

歲盡

綠鱗春水動紅糝早梅開蛇尾悲年去羊皮散曆來肉消寧有血心死更
無灰望斷青盲眼昇平得見迴

次韻曹汝珍雪後見懷

世局斯須見爛柯未忘同調有羊何文承世業波瀾闊官比閒居感慨多
風翼豈能淹北息霜顛仍欲事南訛虛煩雪夜勤招隱循髮空山月罷蘿

笋生十二韻

何人斬伐到脩篁常憶兵戈一慘傷一壘雀飛君子化九淵蛇螫哲人藏
風雷馬策生鱗角曉暮鮫珠上穎芒蟬腹俄抽青玉劔虎皮初解綠沉槍
錦棚天分龍兒抱翠尾風吹鳳子翔鳥樂巢深枝接葉鷲啼日靜粉飄香

吟哦已有笙竽答愛惜曾經尺寸量
颺入聲柔千珮緩月明影立萬夫長
手親拔盡沿根草眼見參過覆頂楊
清闕一窓堪把卷寒侵三伏擬移床
卽今深匿從噴客依舊濃陰覆野塘
物理細推消復長但留根柢耐痠瘡
春盡效東坡

大風捲雲濤蒸濕尚未除
圓月不得出閃閃西北驅
固知積陰久滌蕩非
須臾少康必世後
光武百戰餘先澤
雖在人制勝勤廟謨
英賢共戮力坐
享乃庸愚念彼蟻
虱甲慚此魚鳥軀

遣懷

懷舊意忡忡存亡一夢同
西山饑伴失南巷醉人空
覓賀船徒返思恢路
不通鸞圓腸轉外蟬細耳
鳴中林莽紛披翠溪蓮寂
寞紅烽烟嵐色斷荆
棘水源窮散櫟社神里幽
篁山鬼宮塗泥兼草莽
餽有誰從

雨後

的礫殘陽在樹頭
隔村相喚雨鳴鳩
虹橫複道中天斷
雨打江潮帶月收
開闔螢燈照涼夜
抑揚蟲語鬧先秋
濁醪一酌千愁散
露砌風簷自勸酬
從子汝紹哀詞有序

汝紹字希高吾世父徵君潛齋先生之孫也廉潔忠鯁不能依回閉門讀書不交一人不問一事布袍疏食行年五十而有嬰兒之色燕京破哭三日目盡腫留都之變時時泣語其老奴欲死奴曰郎君幼希高曰人有一半天吾安能顧渠一日襍被入庄收麥因歛鎖鑰付家人曰有急可沉井中希高平生未嘗一宿于外者也家人疑之又怪其語而不敢問去近庄里所使童子先往待久之不至扶路迎之不得明日得尸于僻路淺水中蓋自沉也嗚呼使希高不死今日之慘豈忍見之哉爲賦一章使千載而下知吾家有處士而死節者

犀角詩書種先生膝下孫
龍雛偏愛或犧畫自傳翻棗栗
分恒寡球鏞語不繁家風十畝足
素業百城尊冰雪真人好風流薄俗
敦脩詞精曲折論史究株根門巷舊
池穴衣冠花水源誰知碎珠玉遽見
變乾坤天柱凶顛折滄溟劫火燔腥
羶裂俎豆樵採犯陵園吾子何能見
無人可與論由來一棺土俄逝九霄
鶴忠義由天性君親墮地恩彼哉國
士報陋矣賈人言處士吾家蠲纍囚
楚客原文篁移植返郢樹繫心存踏
海孤英魄登山隻餓魂撫孤齡過隙
懷舊涕連痕短什留家譜遺芬定可
捫

炎劉

炎劉遺澤自汪洋，拔起階無一旅疆。東洛驟開銅馬帝，西秦先遜寶雞王。雲臺宿拱山河謚，釣瀨星連太紫光。遂閉玉關休遠馭，醴泉野穀養痍瘡。

歲盡二首

三年淚灑犬羊天，歲籥渾如劫後看。奉祀豈諳新蜡臘，飾終猶褚漢衣冠。燒殤火傍低星滅，賽社鉦隨戍鼓殘。明日屠蘇敢辭醉，青陽不禁朔風寒。失歲何須守頽齡，祇自憐。此生幾除夜，卽席是明年。力怯藏山澤，心驚變海田。春王有正月，流俗妄相傳。

讀文信公集二首

傾厦誰能一木支，科名雖蚤幸權遲。兩山雅構方投老，萬死餘身更出師。鸞虎從風奔羽檄，蛟螭挾水逐牙旗。蘆花燕子金陵道，長有啼鵲血翅垂。小儒炎午未知公，留虜依稀測此胸。但有殘生能震動，非關一死要從容。玉琳未沒猶梁曆，有鬲雖微繫夏宗。欲採虬鬚那可得，犬羊惕息鎖蛟龍。

金陵三首

三輔江山穴出虎，六朝形勝勢蟠龍。皇基易紹因遷鼎，家痛難忘異舉烽。

夜半誰知越州駕，平明自失景陽鐘。白頭揮日慚無力，西望酣歌淚濕胸。舊客疲驢灑澗陰，橋山春樹獨行吟。翠微寒月熊羆肅，紫昊晴烟松柏深。共看配天修鉅典，誰教陸地作平沉。興亡百變無如此，馬趙偏安也笑今。白頭克賊爲長飢，也幸東周豐鎬齊。灞上忽傳千騎入，襄城已逐七臣迷。兩荒晉闕銅駝沒，風撼昭陵鉄馬嘶。蹭蹬歸來慚復咲，脫列閃尾又塗泥。

近感絕句

亂後

開平飛取舊江山，高帝經營必世間。若許輕捐便輕得，古來創業豈云艱。

生日自開小詭二首

二虎貪饕震鼓輦，一門殺掠到旄倪。秦膺金策天何醉，晉覓花源地已迷。野蓼軒窗楊柳暗，夕陽村巷鷓鴣啼。誰言久旱秋方熟，禾黍能將生棘齊。昔歲曾爲客，生辰每憶鄉。如今松菊徑，已傍虎豺場。七十復餘幾，耕桑不可望。寂寥孤矢恨，方與蓋棺長。遲暮嗟何及，艱危酒暫忘。風枝尚處折，雨葉暗中黃。是物關兵氣，吾身屬醉鄉。開詭今夜忝，明日爲重陽。

吾族 此遺民絕筆詩也

吾族在宋代輪翻稱名門頗執仕韓節終元無顯人大明既中天稍稍登
縉紳迨茲三百年奕葉被國恩小子最不才暮忝觀國賓迨茲祚中絕空
傷發婦魂五人下農祿四葉太平民祈死非吾分偷生媿此身悠悠益棺
意欲與楚龔論

葛理問一龍

出都

未盡歌邊酒數行便騎羸馬出春明何人怨東風裏楊柳飛花雪滿城

睢陽曲

亂山不見萬馬橫寒金燦其華冥晦一時開野潤無際觸骸向人語如何西北塵化作東南雨

八月初二日未刻校完此為

列朝詩集丁集卷十四

原稿二待在京懷葉

中後後編首數時遺

于劉補夫縫中并

此為十首

